

宋

史

六



宋史卷第十九

宋史十九

魏醫言桂國蠻國軍事前書袁相醫國領經筵事都總裁臣脫脫等奉

敕修

徽宗一

徽宗體神合道駿烈遜功聖文仁德憲慈顯孝皇帝諱佶
神宗第十一子也母曰欽慈皇后陳氏元豐五年十月丁
巳生於宮中明年正月賜名十月授鎮寧軍節度使封寧
國公哲宗即位封遂寧郡王紹聖三年以平江鎮江軍節
度使封端王出就傅五年加司空改昭德彰信軍節度元
符三年正月己卯哲宗崩皇太后垂簾哭謂宰臣曰家國

不幸大行皇帝無子天下事須早定章惇厲聲對曰在禮律當立母弟簡王皇太后曰神宗諸子申王長而有目疾次則端王當立惇又曰以年則申王長以禮律則同母之弟簡王當立皇太后曰皆神宗子莫難如此分別於次端王當立知樞密院曾布曰章惇未嘗與臣等商議如皇太后聖諭極當尚書左丞蔡卞中書門下侍郎許將相繼曰合依聖旨皇太后又曰先帝嘗言端王有福壽且仁孝不同諸王於是惇為之默然乃召端王入即皇帝位皇太后權同處分軍國事庚辰赦天下常赦所不原者百官進秩一等賞諸軍遣宋淵告哀于遼辛巳尊先帝后為元符皇

后癸未追尊母貴儀陳氏爲皇太妃甲申命章惇爲山陵使乙酉出先帝遺留物賜近臣丙戌以申王佖爲太傅進封陳王賜贊拜不名丁亥進仁宗淑妃周氏神宗淑妃邢氏並爲貴妃賢妃宋氏爲德妃戊子以章惇爲特進封申國公己丑進封莘王俱爲衛王守太保簡王似爲蔡王睦王偲爲定王並守司徒罷增八廂邏卒二月己亥始聽政尊先帝妃朱氏爲聖瑞皇太妃壬寅以南平王李乾德爲檢校太師丁未立順國夫人王氏爲皇后庚戌向宗回宗良遷節度使太后弟姪未仕者俱授以官癸丑初御紫宸殿庚申以吏部尚書韓忠彥爲門下侍郎資政殿大學士

黃履爲尚書右丞辛酉名懿親宅潛邸曰龍德宮甲子毀承極殿丙寅遣吳安憲朱孝孫以遺留物遺遼國主三月戊辰朔詔宰臣執政侍從官各舉可任臺諫者庚午遣韓治曹譜告即位于遼辛未詔追封祖宗諸子光濟等三十三人爲王女四十八人爲公主甲申以西蕃王隴拶爲河西軍節度使尋賜姓名曰趙懷德邈川首領瞎征爲懷遠軍節度使己丑以日當食降德音于四京減囚罪一等流以下釋之庚寅錄趙普後辛卯詔求直言癸巳以寧遠軍節度觀察留後世雄爲崇信軍節度使封安定郡王乙未却永興民王懷所進玉器夏四月丁酉朔日有食之己亥

令監司分部決獄甲辰以韓忠彥爲尚書右僕射兼中書
侍郎禮部尚書李清臣爲門下侍郎翰林學士蔣之奇同
知樞密院事乙巳錄曹侂後丁未以帝生日爲天寧節己
酉長子亶生辛亥大赦天下應元符二年己前係官逋負
悉蠲之癸丑鹿敏求等以應詔上書遷秩乙卯請大行皇
帝謚于南郊丁巳詔范純仁等復官官觀蘇軾等徙內郡
居住癸亥罷編類臣僚章疏局乙丑賜禮部奏名進士及
第出身五百五十八人五月丁卯朔罷理官失出之罰丙
子詔復廢后孟氏爲元祐皇后乙酉蔡卞罷己丑詔追復
文彥博王珪司馬光呂公著呂大防劉摯等三十三人官

辛卯還司馬光等致仕遺表恩癸巳河北河東陝西饑詔
帥臣計度振恤六月丙申朔遼主遣蕭進忠蕭安世等來
弔祭秋七月丙寅朔奉皇太后詔罷同聽政丁卯告哲宗
欽文睿武昭孝皇帝謚于天地宗廟社稷戊辰上寶冊于
福寧殿癸酉以皇太后還政減天下囚罪一等流以下釋
之癸未遣陸佃李嗣徽報謝于遼罷管句陝西京西川路
坑冶及江西廣東湖北夔梓成都路管句措置鹽事官辛
卯封子亶爲韓國公八月戊戌詔諸路遇民有疾委官監
醫往視疾給藥庚子作景靈西宮奉安神宗神御建哲宗
神御殿於其西辛丑出內庫金帛二百萬糶陝西軍儲壬

寅葬哲宗皇帝于永泰陵丙午遣董敦逸賀遼主生辰呂
仲甫賀正旦戊申高麗王王熙遣使奉表來慰庚戌詔以
仁宗神宗廟永世不祧戊午以蔡王似爲太保癸亥祔哲
宗神主于太廟廟樂曰大成之舞九月甲子詔修哲宗實
錄丙寅遼遣蕭穆來賀即位丁卯減兩京河陽鄭州囚罪
一等民緣山陵役者蠲其賦己巳幸龍德宮辛未章惇罷
丙子以陳王似爲太尉丁丑詔修神宗史己丑復均給職
田冬十月乙未夏國入貢丙申蔡京出知永興軍貶章惇
爲武昌軍節度副使丁酉以韓忠彥爲尚書左僕射兼門
下侍郎壬寅以曾布爲尚書右僕射兼中書侍郎乙卯升

端州爲興慶軍己未詔禁曲學偏見妾意改作以害國事者辛酉罷平準務十一月丁卯詔修六朝寶訓降德音于端州減囚罪一等徒以下釋之庚午詔改明年元戊寅以觀文殿學士安燾知樞密院事庚辰黃履罷己丑置春秋博士辛卯令陝西兼行銅鐵錢以禮部尚書范純禮爲尚書左丞十二月甲午以皇太后不豫禱于宮觀祠廟嶽瀆戊戌出廩粟減價以濟民辛丑慮囚甲辰詔修國朝會要戊申降德音于諸路減囚罪一等流以下釋之戊午遼人來賀正旦是歲出宮女六十九人

建中靖國元年春正月壬戌朔有赤氣起東北亘西南中

函白氣將散復有黑祲在旁癸亥有星自西南入尾其光燭地癸酉范純仁薨甲戌皇太后崩遺詔追尊皇太妃陳氏爲皇太后丁丑易大行皇太后園陵爲山陵命曾布爲山陵使己卯令河陝募人入粟免試注官二月丙申雨雹己亥汰秦鳳路土兵甲辰始聽政乙巳出內庫及諸路常平錢各百萬備河北邊儲丁巳貶章惇爲雷州司戶參軍三月甲子始御紫宸殿乙丑遼使蕭恭來告其主洪基殂遣謝文瓘上官均等往弔祭黃寔賀其子延禧立丁丑詔以河西軍節度使趙懷德知湟州壬午以日當食避殿減膳降天下囚罪一等流以下釋之夏四月辛卯朔日食不

見甲午上大行皇太后謚曰欽聖憲肅乙未上追尊皇太后謚曰欽慈丁酉御殿復膳壬寅詔諸路疑獄當奏而不奏者科罪不當奏而輒奏者勿坐著爲令五月辛酉朔大雨雹詔三省減吏負節冗費丙寅葬欽聖憲肅皇后欽慈皇后可永裕陵庚辰蘇頌薨丙戌祔欽聖憲肅皇后欽慈皇后可神主于太廟戊子減兩京河陽鄭州囚罪一等民緣山陵役者蠲其賦六月庚寅朔以韓國公亶爲開府儀同三司封京兆郡王戊申封向宗回爲永陽郡王向宗良爲永嘉郡王甲寅封吳王顥子孝騫爲廣陵郡王顥子孝參爲信都郡王戊午范純禮罷己未詔班固殺情理輕重格

秋七月辛巳內郡置添差宗室闕丙戌安燾罷丁亥以蔣之竒知樞密院事吏部尚書陸佃爲尚書右丞端明殿學士章綽同知樞密院事九月己巳詔諸路轉運提舉司及諸州軍有遺利可以講求及冗貲浮費當裁損者詳議以聞丙戌子榷薨冬十月乙未李清臣罷丁酉天寧節群臣及遼使初上壽于垂拱殿十一月庚申以陸佃爲尚書左丞吏部尚書溫益爲尚書右丞壬戌以西蕃賒羅撒爲西平軍節度使邈川首領辛未出御製南郊親祀樂章戊寅朝獻景靈宮己卯饗太廟庚辰祀天地于圜丘赦天下改彰信軍爲興仁軍昭德軍爲隆德軍改明年元十二月壬

辰賜陳王佖詔書不名癸卯進神宗昭儀武氏為賢妃丙午奉安神宗神御于景靈西宮大明殿丁未詣宮行禮己酉降德音于四京減囚罪一等徒以下釋之是歲遼人來獻遺留物河東地震京畿蝗江淮兩浙湖南福建旱

崇寧元年春正月丁丑太原等十一郡地震詔死者家賜錢有差二月丙戌朔以聖瑞皇太妃疾慮囚甲午子亶改名烜以蔡確配饗哲宗廟庭戊戌詔士有懷抱道德久沈下僚及學行兼備可厲風俗者待制以上各舉所知二人奉議郎趙諗謀反伏誅庚子封子煥為魏國公辛丑聖瑞皇太妃薨追尊為皇太后庚戌追封孔鯉為泗水侯孔伋

爲沂水侯三月丁巳奉安哲宗神御于景靈西宮寶慶殿
戊午詣宮行禮壬戌以定王偲爲太保壬申幸定王第夏
四月己亥上皇太后謚曰欽成五月丁巳營惑入斗庚申
韓忠彥罷己巳賸征卒庚午降復太子太保司馬光爲正
議大夫太保文彥博爲太子太保餘各以差奪官辛未詔
待制以上舉能吏各二人乙亥黜後苑內侍請以箔金飾
宮殿者丙子詔元祐諸臣各已削秩自今無所復問言者
亦勿輒言戊寅葬欽成皇后于永裕陵己卯陸佃罷庚辰
以許將爲門下侍郎溫益爲中書侍郎翰林學士承旨蔡
京爲尚書左丞吏部尚書趙挺之爲尚書右丞六月己丑

祔欽成皇后神主于太廟壬辰減西京河陽鄭州囚罪一
等民緣山陵役者蠲其賦癸卯詔六曹尚書有事奏陳許
獨負上殿己酉太白晝見壬子改渝州為恭州癸丑詔倣
唐六典修神宗所定官制封伯夷為清惠侯叔齊為仁惠
侯閏月甲寅朔更名哲宗神御殿曰重光辛酉慮囚壬戌
曾布罷甲子詔諸路州縣官有治績最著者許監司帥臣
各舉一人壬午追貶李清臣為武安軍節度副使癸未詔
監司帥臣於本路小使臣以上及親民官內有智謀勇果
可備將帥者各舉一人秋七月甲申朔建長生宮以祠熒
惑丙戌詔省臺寺監及監司郡守並以三年成任戊子以

蔡京爲尚書右僕射兼中書侍郎己丑焚元祐法甲午詔於都省置講議司詔杭州明州置市舶司庚子章棻罷甲辰以雨水壞民廬舍詔開封府振恤壓溺者辛亥罷春秋博士八月乙卯子烜改名桓煥改名楷乙丑罷權侍郎官辛未置安濟坊養民之貧病者仍令諸郡縣並置甲戌詔天下興學貢士建外學于國南丙子詔司馬光等二十一人子弟毋得官京師己卯以趙挺之爲尚書左丞翰林學士張商英爲尚書右丞九月戊子京師置居養院以處鰥寡孤獨仍以戶絕財產給養乙未詔中書籍元符三年臣僚章疏姓名爲正上正中正下三等邪上邪中邪下三等

丁酉治臣僚議復元祐皇后及謀廢元符皇后者罪降韓忠彥曾布官追貶李清臣爲雷州司戶叅軍黃履爲祁州團練副使竄曾肇以下十七人已亥籍元祐及元符末宰相文彥博等侍從蘇軾等餘官秦觀等內臣張士良等武臣王獻可等凡百有二十人御書刻石端禮門庚子以元符末上書人鍾世美以下四十一人爲正等悉加旌擢范柔中以下五百餘人爲邪等降責有差時世美已卒詔贈官仍官其子一人壬寅貶曾布爲武泰軍節度使甲辰詔元符三年建中靖國元年責降臣僚已經牽復者其元責告命並繳納尚書省冬十月癸亥蔣之奇罷戊辰詔責降

宮觀人不得同一州居住甲戌以御史錢適石豫左膚及
輔臣蔡京許將溫益趙挺之張商英等言罷元祐皇后之
號復居瑤華宮丙子劉奉世等二十七人坐元符末黨與
變法並罷祠祿戊寅以資政殿學士蔡卞知樞密院事十
一月乙酉邵州言知溪洞徽州楊光銜內附戊子以婉儀
鄭氏爲賢妃辛卯置河北安濟坊癸巳置西南兩京宗正
司及敦宗院戊戌置顯謨閣學士待制官戊申子楷爲開
府儀同三司封高密郡王己酉立卿監郎官三歲黜陟法
十二月癸丑論棄湟州罪貶韓忠彥爲崇信軍節度副使
曾布爲賀州別駕安燾爲寧國軍節度副使范純禮分司

南京庚申鑄當五錢辛酉贈哲宗子鄧王茂爲皇太子謚
獻愍丁丑詔諸邪說詖行非先聖賢之書及元祐學術政
事並勿施用是歲京畿京東河北淮南蝗江浙熙河漳泉
潭衡郴州興化軍旱辰沅州徭入寇出宮女七十六人
二年春正月辛巳朔乙酉竄任伯雨陳瓘龔夬鄒浩于嶺
南馬洧等九人分貶諸州知荆南舒亶平辰沅州徭賊復
誠徽州改誠州爲靖州徽州爲蒔竹縣壬辰溫益卒乙巳
以復荆湖疆土曲赦兩路丙午以沍寒令監司分部決獄
丁未以蔡京爲尚書左僕射兼門下侍郎二月辛亥安化
蠻入寇廣西經略使程節敗之壬子遣官相度湖南北徭

地取其材植入供在京營造甲寅進元符皇后為太后宮
名崇恩辛酉置殿中監癸亥奉安哲宗御容于西京會聖
宮及應天院丙子置諸路茶場三月壬午進仁宗充儀張
氏為賢妃乙酉減西京囚罪一等詔黨人子弟毋得擅到
闕下其應緣趨附黨人罷任在外指射差遣及得罪停替
臣僚亦如之丁亥御集英殿策進士癸卯賜禮部奏名進
士及第出身五百三十八人其嘗上書在正等者升甲卯
等者黜之夏四月甲寅詔侍從官各舉所知二人乙卯于
闈入貢丁卯詔毀呂公著司馬光呂大防范純仁劉摯范
百祿梁燾王巖叟景靈西京繪像己巳以初謁景靈宮

赦天下乙亥詔毀刊行唐鑑并三蘇秦黃等文集戊寅以
趙挺之為中書侍郎張商英為尚書左丞戶部尚書吳居
厚為尚書右丞兵部尚書安惇同知樞密院事奪王珪贈
謚追毀程頤出身文字其所著書令監司覺察五月辛巳
以賢妃鄭氏為淑妃癸未以陳王佖為太師丙戌貶曾布
為廉州司戶參軍己亥封子楫為楚國公丙午冊元符皇
后劉氏為太后六月壬子冊王氏為皇后庚申詔元符末
上書進士類多詆訕令州郡遣入新學依太學自訟齋法
候及一年能革心自新者許將來應舉其不變者當屏之
遠方壬戌慮囚是月中太一宮火復湟州秋七月己卯學

士院火辛巳以復湟州進蔡京官三等蔡卞以下二等壬午白虹貫日甲申降德音于熙河蘭會路減囚罪一等流以下釋之庚寅曾肇責授濮州團練副使辛卯詔上書進士見充三舍生者罷歸丁酉詔自今戚里宗屬勿復爲執政官著爲令乙巳詔責降人子弟毋得任在京及府界差遣八月丁未朔再論棄湟州罪貶韓忠彥爲磁州團練副使安燾爲祁州團練副使范純禮爲靜江軍節度副使削蔣之奇秩三等戊申張商英罷辛酉詔張商英入元祐黨籍九月辛巳詔宗室不得與元祐姦黨子孫爲昏姻庚寅封子樞爲吳國公詔上書邪等人知縣以上資序並與外

祠選人不得改官及為縣令壬辰置醫學癸巳今天下郡
皆建崇寧寺辛丑改吏部選人自承直郎至將仕郎七階
令天下監司長吏廳各立元祐姦黨碑甲辰詔郡縣謹祀
社稷冬十一月庚辰以元祐學術政事聚徒傳授者委監
司察舉必罰無赦十二月癸亥祧宣祖皇帝昭憲皇后丙
寅詔六曹長貳歲考郎官治狀分三等以聞是歲諸路蝗
纂府蠻楊晟銅融州楊晟天邵州黃聰內附

三年春正月己卯安化蠻降辛巳詔上書邪等人毋得至
京師戊子鑄當十大錢壬辰增縣學弟子貢甲午賜蔡京
子攸進士出身癸卯太白晝見甲辰鑄九鼎二月丙午以

淑妃鄭氏爲貴妃以刊定元豐役法不當黜錢適以下九
人丁未置漏澤園己酉詔王珪章惇別爲一籍如元祐黨
詔自今御後殿許起居郎舍人侍立壬子以楚國公楫爲
開府儀同三司封南陽郡王庚申令天下坑冶金銀復盡
輸內藏辛未雨雹三月辛巳置文繡院丁亥作園土以居
彊盜貸死者甲午躋欽成皇后神主於欽慈皇后之上辛
丑大內災夏四月乙巳以火災降德音于四京減囚罪一
等流以下原之乙卯復鄆州建爲隴右都護府辛酉徙封
楫爲樂安郡王復廓州乙丑罷講議司己巳曲赦陝西壬
申楫薨五月戊寅罷開封權知府置牧尹少尹改定六曹

以士戶儀兵刑工爲序增其負數倣唐六典易胥吏之稱
己卯以復鄴廓蔡京爲守司空封嘉國公庚辰許將趙挺
之吳居厚安惇蔡卞各轉三官甲申改鄴州爲西寧州仍
爲隴右節度辛丑詔黜守臣進金助修宮庭者六月壬寅
朔圖熙寧元豐功臣於顯謨閣癸卯以王安石配饗孔子
廟丙午增諸州學未立者壬子置書畫算學占城入貢戊
午詔重定元祐元符黨人及上書邪等者合爲一籍通三
百九人刻石朝堂餘並出籍自今毋得復彈奏辛酉復置
太醫局癸亥慮囚乙丑詔內外官毋得越職論事僥倖奔
競違者御史臺彈奏秋七月癸酉以婉儀王氏爲德妃庚

辰詔自今大禮不受尊號羣臣母上表辛卯行方田法八月庚子詔諸路知州通判增入主管學事四字壬寅大雨壞民廬舍令收瘞死者甲辰蔡京上神宗史丙午許將罷九月乙亥以趙挺之爲門下侍郎吳居厚爲中書侍郎翰林學士承旨張康國爲尚書左丞刑部尚書鄧洵武爲尚書右丞壬辰詔諸路州學別置齋舍以養材武之士冬十月辛丑朔大雨雹丁未賢妃張氏薨丙辰命官編類六朝勲臣戊午夏人入涇原圍平夏城寇鎮戎軍庚申熙河蘭會路經略安撫使王厚言河西軍節度使趙懷德等出降己巳立九廟復翼祖宣祖庚午貴妃邢氏薨十一月甲戌

幸太學官論定之士十六人遂幸辟雍賜國子司業吳綱
蔣靜四品服學官推恩有差丙戌封子杞為翼國公丁亥
詔取士並繇學校罷發解及省試法科場如故事癸巳更
上神宗謚曰體元顯道帝德王功英文烈武欽仁聖孝皇
帝加上哲宗謚曰憲元繼道顯德定功欽文睿武齊聖昭
孝皇帝甲午朝獻景靈宮乙未饗太廟丙申祀昊天上帝
于園丘赦天下升興仁隆德軍為府還彰信昭德舊節十
二月乙巳升通遠軍為鞏州戊午賜陳王佖入朝不趨是
歲諸路蝗出宮女六十二人廣西黎洞楊晟免等內附

本紀卷第二十

宋史二十

開府儀同三司柱國錄軍國事前行書省丞相兼樞密院領經筵事都總裁臣脫脫等奉

敕修

徽宗二

四年春正月庚午朔改熙河蘭會路為熙河蘭湟路丙戌
築溪哥城壬辰詔察諸路監司貪虐者論其罪丙申詔京
畿路改置轉運使提點刑獄官蔡卞罷立武學法丁酉秦
鳳蕃落獻邦潘疊三州以內侍童貫為熙河蘭湟秦鳳路
經略安撫制置使二月乙巳築御謀城己酉置親衛勳衛
翊衛郎中郎等官以勳戚近臣之兄弟子孫有官者試充



甲寅以張康國知樞密院事兵部尚書劉逵同知樞密院
事吏部尚書何執中爲尚書左丞乙卯班方田法庚申詔
西邊用兵能招納羌人者與斬級同賞壬戌升趙州爲慶
源軍甲子雨雹乙丑改三衛郎爲侍郎閏月壬申復元豐
銓試斷按法令州縣倣尚書六曹分六案甲申置陝西河
東河北京西監鑄當二夾錫鐵錢己丑御端門受趙懷德
降授感德軍節度使封安化郡壬辰曲赦熙河蘭湟路
三月壬寅置青海馬監甲辰以趙挺之爲尚書右僕射兼
中書侍郎丙午詔建王古峇爲懷遠軍庚戌令呂惠卿致
仕戊午復銀州乙丑詔州縣屬鄉聚徒教授者非經書子

史母習丁卯牂牁夜郎首領以地降是月夏人攻塞門砦
夏四月辛未遼遣蕭良來爲夏人求還侵地及退兵戊寅
夏人攻臨宗砦辛巳詔諸路走馬承受毋得預軍政及邊
事己丑夏人寇順寧砦鄜延第二副將劉延慶擊破之復
攻湟州北蕃市城知州辛叔獻等擊却之五月戊申除黨
人父兄子弟之禁壬子遣林攄報聘于遼賜張繼先號虛
靖先生癸丑罷轉運司檢察鈞考法辛酉命官分部決獄
六月丙子復解池鹽占城入貢丁丑慮囚辛巳罷陝西河
東力役甲申曲赦熙河陝西河東京西路戊子趙挺之罷
秋七月丙申朔罷三京國子監官各置司業一員辛丑置

熒惑壇置四輔郡以潁昌府為南輔襄邑縣為東輔鄭州
為西輔澶州為北輔甲寅詔奪元祐輔臣墳寺丁巳還上
書流人戶部尚書曾孝廣坐錢帛皆闕出知杭州八月戊
辰以德妃王氏為淑妃庚午以王江古州歸順置提舉溪
洞官二員改懷遠軍為平州丙子以東輔為拱州甲申奠
九鼎于九成宮乙酉詣宮酌獻辛卯賜新樂名大晟置府
建官壬辰遣劉正夫使遼九月己亥赦天下乙巳詔元祐
人貶謫者以次徙近地惟不得至畿輔詔京畿三路保甲
並於農隙時教閱乙卯賜上舍生三十五人及第丙辰詔
自今非宰臣毋得除特進冬十月自七月雨至是月不止

甲申以左右司所編紹聖元符以來申明斷例班天下刑
名例班刑部大理司丁亥外武岡縣為軍戊子詔上書進
士未獲者限百日自陳免罪壬辰日中有黑子十一月戊
戌安定郡王世雄薨丙辰置諸路提舉學事官己未章惇
卒十二月癸酉升拱州為保慶軍甲申分平州置九州格
州是歲蘇湖秀三州水賜乏食者粟泰州未生糴

五年春正月戊戌彗出西方其長竟天庚子復置江湖淮
浙常平都倉甲辰以吳居厚為門下侍郎劉逵為中書侍
郎乙巳以星變避殿損膳詔求真言闕政毀元祐黨人碑
復謫者仕籍自今言者勿復彈糾丁未太白晝見赦天下

除黨人一切之禁權罷方田戊申詔侍從官奏封事己酉
罷諸州歲貢供奉物庚戌詔崇寧以來左降者各以存歿
稍復其官盡還諸徙者辛亥御殿復膳壬子罷園土法丁
巳罷書畫筭醫四學壬戌復書畫筭學二月甲子朔詔監
司條奏民間疾苦丙寅蔡京罷爲開府儀同三司中太一
宮使以觀文殿大學士趙挺之爲特進尚書右僕射兼中
書侍郎庚午詔翰林學士兩省官及館閣自今並除進士
出身人壬申省內外冗官罷醫官兼宮觀者蒲甘國入貢
丁丑以前後所降御筆手詔模印成冊班之中外州縣不
遵奉者監司按劾監司推行不盡者諸司互察之三月丙

申詔星變已消罷求直言辛丑改威德軍爲石堡砦封眉
州防禦使世福爲安定郡王癸卯御集英殿策進士丁未
罷諸州武學乙卯廢銀州爲銀川城丙辰蔡王似薨己未
賜禮部奏名進士及第出身六百七十一人夏四月丁丑
停免兩浙水災州郡夏稅五月丁未班紀元曆辛亥封子
栩爲魯國公乙卯罷辟舉盡復元豐選法六月癸亥立諸
路監司互察法庇匿不舉者罪之仍令御史臺糾劾改格
州爲從州甲子詔求隱逸之士令監司審覈保奏其緣私
者御史察之丁卯詔輔臣條具東南守備策壬申慮囚秋
七月庚寅朔日當食不虧壬寅詔改明年元九月辛丑河

南府嘉禾與芝草同本生冬十月己卯升澶州爲開德府
庚辰降德音于開德府減囚罪一等徒以下釋之十一月
辛卯陳王佖薨乙巳詔立武士貢法辛亥併京畿提刑入
轉運司十二月戊午朔日當食不虧群臣稱賀己未劉逵
罷壬戌詔臣僚休日請對特御便殿己巳詔監司按事有
懷姦挾情不盡實者流竄不叙是歲廣西黎洞韋晏開等
內附

大觀元年春正月戊子朔赦天下甲午以蔡京爲尚書左
僕射兼門下侍郎戊戌幸興德禪院復廢官庚子復置議
禮局於尚書省甘露降于帝鼎內群臣稱賀壬寅吳居厚

罷戊申進封衛王悞為魏王定王偲為鄧王壬子以何執
中為中書侍郎鄧洵武為尚書左丞戶部尚書梁子美為
尚書右丞乙卯封仲揅為南康郡王仲御為汝南郡王二
月壬戌以向宗回為開府儀同三司徙封安康郡王甲子
以黎洞納土曲赦廣西乙亥復醫學己卯復行方田丙戌
以平昌郡君韋氏為才人三月丁酉趙挺之罷以何執中
為門下侍郎鄧洵武為中書侍郎梁子美為尚書左丞吏
部尚書朱諤為右丞甲辰立八行取士科癸丑趙挺之卒
夏四月乙丑以淑妃王氏為貴妃五月己丑封子棧為揚
國公朝散郎吳儲承議郎吳俸坐與妖人張懷素謀反伏

誅貶呂惠卿爲祁州團練副使庚寅鄧洵武罷甲午詔班
新樂于天下癸卯詔自今凡總一路及監司之任勿以元
祐學術及異意人充選以安化蠻犯邊益兵赴廣西討之
乙巳子構生六月己未以梁子美爲中書侍郎壬戌詔景
靈宮建僖祖殿室甲子以黎人地爲庭孚二州癸酉賜上
舍生二十九人及第乙亥朱諤卒丁丑慮囚甲申以才人
韋氏爲婕妤秋七月乙酉朔伊洛溢戊子詔括天下漏丁
壬寅班祭服于州郡乙巳賢妃武氏薨八月乙卯曾布卒
丁巳封子構爲蜀國公庚申以戶部尚書徐處仁爲尚書
右丞吏部尚書林摠同知樞密院事己巳降德音于淮海

吳楚二十六州減囚罪一等流以下釋之九月庚寅建顯
烈觀於陳橋己酉加上僖祖謚曰立道肇基積德起功懿
文憲武睿和至孝皇帝朝獻景靈宮庚戌饗太廟辛亥大
饗明堂赦天下升永興軍爲大都督府章縱坐冒法竄海
島李景直等四人以上書觀望罪並編管嶺南冬十月己
未詔士有才武絕倫者歲貢準文士上舍上等法辛酉蘇
州地震乙丑貶張商英爲安化軍節度副使己巳大雨雹
閏月丙戌以林攄爲尚書左丞資政殿學士鄭居中同知
樞密院事乙未詔守令以戶口爲殿最升桂州爲大都督
府鎮州爲靖海軍節度壬寅禁用翡翠乙巳升太原府鄆

州並為大都督府十一月壬子朔日有食之蔡京等以不
及所當食分率群臣稱賀乙丑置符寶郎己巳升瀛州為
河間府瀛海軍節度戊寅南丹州刺史莫公佺降徐處仁
以母憂去位十二月庚寅以蔡京為太尉進何執中以下
官二等癸巳以江寧荆南揚杭越洪福潭廣桂並為帥府
置黔南路丁酉置開封府府學己亥以婉容喬氏為賢妃
開溟河是歲秦鳳旱京東水河溢遣官振濟貸被水戶租
廬州雨豆汀懷二州慶雲見乾寧軍同州黃河清于閩夏
國入貢涪州夷駱世華駱文貴內附

二年春正月壬子朔受八寶于大慶殿赦天下文武進位

一等蔡京表賀符瑞乙卯以婉儀劉氏爲德妃己未蔡京
進太師加童貫節度使仍宣撫庚申進封魏王侯爲燕王
鄧王偲爲越王並爲太尉京兆郡王桓爲定王高密郡王
楷爲嘉王並爲司空吳國公樞爲建安郡王冀國公杞爲
文安郡王楚國公栩爲安康郡王楊國公棫爲濟陽郡王
蜀國公構爲廣平郡王並爲開府儀同三司甲子以神宗
德妃宋氏劉氏爲淑妃賢妃喬氏爲德妃庚午徙封仲損
爲齊安郡王仲御爲華陽郡王孝騫爲晉康郡王孝參爲
豫章郡王並開府儀同三司封仲增爲信安郡王仲忽爲
普安郡王仲癸爲咸安郡王仲僕爲同安郡王仲糜爲淮

安郡王戊寅徙封向宗回爲漢東郡王向宗良爲開府儀同三司仲損薨河東北盜起二月甲申置諸州曹掾官甲午詔建徽猷閣藏哲宗御集置學士直學士待制官己亥以安德軍節度使錢景臻爲開府儀同三司庚戌以婕妤韋氏爲修容三月庚申班金錄靈寶道場儀範于天下甲子封子材爲魏國公乙亥封子模爲鎮國公戊寅賜上舍生十三人及第升乾寧軍爲清州詔監司歲舉所部郡守二人縣令四人赴三省審察夏四月甲辰復洮州五月庚戌朔日有食之辛亥慮囚以復洮州功賜蔡京玉帶加童貫檢校司空仍宣撫甲寅復諸路歲貢供奉物壬戌溪哥

王子臧征撲哥降復積石軍戊辰詔官蔡京子孫一人進
執政官一等六月乙酉以涪夷地爲珍州甲午以平夏城
爲懷德軍乙未以殿中六尚筭學太官局翰林儀鸞司皆
隸六察秋七月庚戌罷建僖祖殿室乙卯以婉容王氏爲
賢妃八月辛巳邢州河水溢壞民廬舍復被水者家丙申
中書侍郎梁子美罷知鄆州己亥置保州敦宗院九月辛
亥以林攄爲中書侍郎吏部尚書余深爲尚書左丞壬戌
貶向宗回爲太子少保致仕壬申封子植爲吳國公癸酉
皇后王氏崩削向宗回官爵丙子曲赦熙河蘭湟秦鳳永
興軍路冬十一月丁未朔太白晝見乙丑上大行皇后謚

曰靖和十二月壬寅陪葬靖和皇后于永裕陵是歲同州
黃河清出宮女七十有七人于闐夏國入貢涪夷任應舉
楊文貴湖南徭楊再光內附

三年春正月乙卯祔靖和皇后神主于別廟己未減兩京
河陽鄭州囚罪一等民緣園陵役者蠲其賦丁卯以涪夷
地爲承州甲戌升湟州爲嚮德軍節度二月丙子朔播州
楊文貴納土以其地置遵義軍丁丑韓忠彥致仕三月丙
午立海商越界法庚戌御集英殿策進士辛酉詔四川郡
守並選內地人任之壬戌併黔南入廣西路乙丑賜禮部
奏名進士及第出身六百八十五人壬申張康國卒夏四

月戊寅林摠罷戊子以淑妃劉氏爲貴妃癸巳以鄭居中
知樞密院事吏部尚書管師仁同知樞密院事癸卯以余
深爲中書侍郎兵部尚書薛昂爲尚書左丞工部尚書劉
正夫爲尚書右丞五月乙巳朔孟翊獻所畫卦象謂宋將
中微宜更年號改官名變庶事以厭之帝不樂詔竄遠方
丙辰令辟雍宴用雅樂丁巳慮囚戊辰大雨雹辛未以德
妃喬氏爲貴妃六月甲戌朔詔修樂書管師仁罷丁丑蔡
京罷辛巳以何執中爲特進尚書左僕射兼門下侍郎以
瀘夷地爲純滋二州庚寅冀州河水溢秋七月丁未詔謫
籍人除元祐姦黨及得罪宗廟外餘並錄用丙辰詔罷都

提舉茶事司在京令戶部在外令轉運司主之八月乙酉
封子朴爲雍國公己丑嗣濮王宗漢薨甲午以仲增爲開
府儀同三司封嗣濮王丙申升融州爲清遠軍節度己亥
韓忠彥薨九月癸丑封子棣爲徐國公己未賜天下州學
藏書閣名稽古冬十月癸巳減六尚局供奉物十一月丁
未詔筭學以黃帝爲先師風后等八人配饗巫咸等七十
人從祀己巳蔡京進封楚國公致仕仍提舉哲宗實錄朝
朔望十二月己亥罷東南鑄夾錫錢是歲江淮荆浙福建
旱秦鳳階成饑發粟振之蠲其賦陝州同州黃河清閣婆
占城夏國入貢瀘州夷王募弱內附

四年春正月癸卯罷改鑄當十錢辛酉詔士庶拜僧者論
以大不恭丁卯夏國入貢二月庚午朔禁然頂煉臂刺血
斷指庚辰罷京西錢監甲申詔自今以賞進秩者毋過中
奉大夫己丑以余深爲門下侍郎資政殿學士張商英爲
中書侍郎戶部尚書侯蒙同知樞密院事壬辰罷河東河
北京東鑄夾錫鐵錢三月庚子募飢民補禁卒詔醫學生
併入太醫局筭入太史局書入翰林書藝局畫入翰林畫
圖局學官等並罷甲寅敕所在振恤流民癸亥詔罪廢人
稍加甄叙能安分守者不俟滿歲各與叙進以責來効丙
寅賜上舍生十五人及第戊辰詔上書邪下等人可依無

過人例今後改官升任並免檢舉夏四月己卯班樂尺于
天下癸未蔡京上哲宗實錄丙申立感生帝壇丁酉詔修
哲宗史五月壬寅停僧牒三年丁未慧出奎婁甲寅立詞
學兼茂科丙辰詔以慧見避殿減膳令侍從官直言指陳
闕失戊午赦天下壬戌改廣西黔南路爲廣南西路癸亥
治廣西妄言拓地罪追貶帥臣王祖道爲昭信軍節度副
使甲子貶蔡京爲太子少保丙寅余深罷六月庚午御殿
復膳乙亥以張商英爲尚書右僕射兼中書侍郎壬辰復
向宗回爲開府儀同三司漢東郡王乙未慮囚丙申薛昂
罷秋七月辛丑復罷方田戊申封子樛爲冀國公八月乙

亥以劉正夫爲中書侍郎侯蒙爲尚書左丞翰林學士承
旨鄧洵仁爲尚書右丞戊寅省內外冗官庚辰以資政殿
學士吳居厚爲門下侍郎丁亥行內外學官選試法閏月
辛丑詔諸路事有不便於民者監司條奏之癸卯改陵井
監爲仙井監辛酉詔戒朋黨以張閣知杭州兼領花石綱
九月丙寅朔日有食之冬十月丁酉立貴妃鄭氏爲皇后
鄭居中罷戊戌太白晝見以吳居厚知樞密院事十一月
乙丑朔朝景靈宮丙寅饗太廟丁卯祀昊天上帝于園丘
赦天下改明年元丙戌罷拱州爲襄邑縣十二月庚戌改
謚靖和皇后爲惠恭是歲夔州江水溢海水清出宮女四

百八十六人南丹州首領莫公晟內附

政和元年春正月己巳以賢妃王氏為德妃壬申毀京師
淫祠一千三十八區戊寅封子拱為定國公丙戌廢白龔
二州壬辰詔百官厲名節二月壬寅冊皇后乙巳詔陝西
河東復鑄夾錫錢丙午以太子少師鄭紳為開府儀同三
司三月己巳詔監司督州縣長吏勸民增植桑柘課其多
寡為賞罰癸酉以吏部尚書王襄同知樞密院事夏四月
乙卯罷陝西河東鑄夾錫錢丙辰慮囚立守令勸農黜陟
法丁巳以淮南旱降囚罪一等徒以下釋之五月癸亥詔
四川羨餘錢物歸左藏庫戊辰改當十錢為當三己卯東

南有星晝墮丁亥解池生紅鹽六月甲寅復蔡京爲太子
少師秋七月壬申以疾愈赦天下癸未廢平從二州爲砦
八月乙未復蔡京爲太子太師丁巳張商英罷戊午詔監
司部內官吏一歲中有犯罪至三人以上雖不及三人而
或有曾薦舉者罪及監司九月戊寅王襄罷丁亥封子栻
爲廣國公是月鄭允中童貫使遼以李良嗣來良嗣獻取
燕之策詔賜姓趙冬十月辛卯以用事之臣多險躁朋比
下詔申做庚戌封昭化軍節度使宗粹爲信安郡王辛亥
貶張商英爲崇信軍節度副使十一月壬戌以上書邪等
及曾經入籍人並不許試學官丙子封子榛爲福國公十

二月己酉詔臺諫以直道覈是非毋憚大吏毋比近習辛亥廢鎮州升瓊州為靖海軍是歲虔州芝草生蔡州瑞麥連野河南府嘉禾生野蠶成繭出宮女八十人交趾夏國入貢

本紀卷第二十

本紀卷第二十一 宋史二十一

開儀衛司上柱國驍國軍前書丞相兼樞國史領經筵事都總裁臣脫脫等奉

敕修

徽宗三

二年春正月甲子制上書邪等人並不除監司二月戊子朔蔡京復太師致仕賜第京師庚子以婉容崔氏為賢妃三月戊午朔定國公拱薨己巳御集英殿策進士己卯賜禮部奏名進士及第出身七百十三人夏四月己丑詔縣令以十二事勸農於境內躬行阡陌程督勤惰辛卯復行方田日中有黑子甲午宴蔡京等于太清樓乙巳以定國

軍節度使仲忽爲開府儀同三司庚戌以何執中爲司空
壬子賜張商英自便五月癸亥慮囚丁卯封子椿爲慶國
公己巳蔡京落致仕三日一至都堂議事六月己丑以資
政殿學士余深爲門下侍郎乙卯白虹貫日秋七月壬申
訪天下遺書丙子置禮制局九月壬午改太尉以冠武階
癸未正三公三孤官改侍中爲左輔中書令爲右弼左右
僕射爲太宰少宰罷尚書令冬十月乙巳得玉圭於民間
十一月己未置知客省引進四方館東西上閣門事戊寅
日南至受元圭于大慶殿赦天下辛巳蔡京進封魯公以
何執中爲少傅太宰兼門下侍郎執政皆進秩十二月甲

申行給地牧馬法乙酉以鄭居中爲特進丙戌以武信軍
節度使童貫爲太尉乙巳定命婦名爲九等丙午燕輔臣
于延福宮辛亥封子握爲衛國公是歲成都府蘇州火出
宮女三百八十三人高麗入貢成都路夷人董舜咨董彥
博內附置棋亨二州

三年春正月己未以定王桓嘉王楷並爲太保庚申以廣
平郡王構爲檢校太保甲子詔以天錫元圭遣官冊告永
裕永泰陵丙寅以燕王俱爲太傅癸酉追封王安石爲舒
王子雱爲臨川伯配饗文宣王廟丁丑吳居厚罷以觀文
殿學士鄭居中知樞密院事己卯以越王偲爲太傅封子

捷爲韓國公二月甲申以德妃王氏爲淑妃庚寅罷文臣
勲官辛卯崇恩太后暴崩甲午以遼女真相持詔河北沿
邊防丁酉詔百官奉祠祿者並以三年爲任乙巳增定六
朝勲臣一百一十六人三月壬子朔日有食之戊辰進神
宗淑妃宋氏爲貴妃升永安縣爲永安軍癸酉賜上舍生
十九人及第夏四月戊子作保和殿庚寅以復溱播等州
降德音于梓夔路癸巳鄧洵仁罷乙巳以福寧殿東建玉
清和陽宮丙午升定州爲中山府己酉以資政殿學士薛
昂爲尚書右丞庚戌班五禮新儀閏月丙辰改公主爲帝
姬戊午復置醫學辛酉上崇恩太后謚曰昭懷庚午慶國

公椿薨五月乙酉慮囚丙申升蘇州爲平江府庚子大盈
倉火壬寅以築溱播進執政官一等丙午葬昭懷皇后于
永泰陵丁未詔尚書內省分六司以掌外省六曹所上之
事置內宰副宰內史治中等官及都事以下吏員己酉班
新燕樂六月癸亥祔昭懷皇后神主于太廟戊辰降兩京
河陽鄭州囚罪一等民緣園陵役者蠲其賦秋七月癸未
升趙城縣爲慶祚軍甲申還王珪孫固贈謚追復韓忠彥
曾布安燾李清臣黃履等官職庚子貴妃劉氏薨壬寅復
置白州八月甲戌以燕樂成進執政官一等丙子以何執
中爲少師丁丑升潤州爲鎮江府戊寅封四鎮山爲王九

月庚寅詔大理寺開封府不得奏獄空其推恩支賜並罷
戊戌追冊貴妃劉氏爲皇后謚曰明達冬十月乙丑閱新
樂器于崇政殿出古器以示百官戊辰詔冬祀大禮及朝
景靈宮並以道士百人執威儀前導冬十一月辛巳朝獻
景靈宮壬午饗太廟加上神宗謚曰體元顯道法古立憲
帝德王功英文烈武欽仁聖孝皇帝改上哲宗謚曰憲元
繼道世德揚功欽文睿武齊聖昭孝皇帝癸未祀昊天
帝于園丘大赦天下升端州爲興慶府乙酉以天神降詔
告在位作天真降臨示現記己丑以賢妃崔氏爲德妃壬
辰築祥州己亥詔有官人許舉八行十二月癸丑詔天下

訪求道教僊經乙卯詔天下貢醫士辛酉太白晝見是歲
江東旱温封滋三州火出宮女二百七十有九人

四年春正月戊寅朔置道階凡二十六等辛丑追封濮王
子宗誼爲祁王宗詠爲萊王宗師爲温王宗輔爲楚王宗
博爲蕭王宗沔爲霍王宗蓋爲建王宗勝爲哀王二月丁
巳賜上舍生十七人及第癸亥改涪井監爲長寧軍癸酉
長子桓冠三月丙子朔以淑妃王氏爲貴妃夏四月庚戌
幸尚書省以手詔訓誡蔡京何執中各官遷秩吏賜帛有
差癸丑闕太學辟雍諸生雅樂甲子改戎州爲叙州五月
丙戌始祭地于方澤以太祖配降德音于天下子機薨六

月戊午慮囚壬申以廣西溪洞地置隆兪二州秋七月丁丑置保壽粹和館以養宮人有疾者戊寅焚苑東門所儲毒藥可以殺人者仍禁勿得復貢甲午祔明達皇后神主于別廟八月乙巳改端明殿學士為延康殿學士樞密直學士為述古殿直學士癸亥定武臣橫班以五十員為額九月己卯以安靜軍節度使王憲為開府儀同三司己亥詔諸路兵應役京師者並以十月朔遣歸冬十月乙巳復置拱州十一月丁丑封子挺為相國公十二月己酉以禁中神御殿成減天下囚罪一等癸丑定朝議奉直大夫以八十員為額己未詔廣南市舶司歲貢真珠犀角象齒是

歲相州野蠶成繭出宮女六十八人

五年春正月庚辰瀘南晏州夷反尋詔梓州路轉運使趙
適等督兵討平之己丑令諸州縣置醫學立貢額甲午改
龍州爲政州二月乙巳立定王桓爲皇太子甲寅冊皇太
子赦天下庚午以童貫領六路邊事三月辛未朔太白晝
見己卯御集英殿策進士甲申追論至和嘉祐定策功封
韓琦爲魏郡王復文彥博官丁亥詔以立皇太子見責降
文武臣僚並與牽復甄叙凡千五百人壬辰升舒州爲德
慶軍癸巳賜禮部奏名進士出身六百七十人夏四月甲
辰作葆真宮丁未詣景靈宮還幸祕書省進館職官一等

庚戌改集賢殿爲右文殿癸亥置宣和殿學士詔東宮講
讀官罷讀史五月壬辰慮囚六月癸丑以修三山河橋降
德音于河北京東京西路秋七月戊辰朔日有食之乙亥
升汝州爲陸海軍丁丑詔建明堂于寢殿之南甲申昭慶
軍節度使蔡卞爲開府儀同三司丁亥封子樾爲瀛國公
八月己酉以秘書省地爲明堂辛亥升通利軍爲濬州平
川軍節度嗣濮王仲增薨九月己卯封仲御爲嗣濮王丙
戌封子栻爲惠國公冬十月癸卯以嵩山道人王仔昔爲
冲隱處士戊午夏國入貢十一月癸酉錄昭憲皇后杜氏
之裔庚寅高麗遣子弟入學十二月己亥升遂州爲遂寧

府庚申以平晏夷曲赦四川癸亥置緣邊安撫司于瀘州
是歲平江府常湖秀州水出宮女五十人

六年春正月戊子以瀘南獻捷轉宰執一官以童貫宣撫
陝西河北閏月壬寅升潁州爲順昌府丁未置道學二月
丁亥詔增廣天下學舍庚寅詔廣京城三月癸丑賜上舍
生十一人及第夏四月乙丑會道士于上清寶籙宮辛未
以何執中爲太傅致仕朝朔望丁丑詔天寧諸節及壬戌
日杖已下罪聽贖丙戌卻監司守臣進獻庚寅詔蔡京三
日一朝正公相位總治三省事五月丁酉廢錫錢庚子以
鄭居中爲少保太宰兼門下侍郎劉正夫爲特進少宰兼

中書侍郎壬寅以保大軍節度使鄧洵武知樞密院事六月丙寅班中書官制格庚午慮囚甲戌詔堂吏遷官至奉直大夫止癸未皇太子納妃朱氏秋七月壬辰朔以震武城爲震武軍甲午以德妃崔氏爲貴妃辛亥以河陽三城節度使王薦爲開府儀同三司諸盜晏州卜漏沅州黃安俊定邊軍李叱啣伏誅詔函首于甲庫壬子曲赦湖北已未解池生紅鹽辛酉改走馬承受公事爲廉訪使者八月壬戌朔戒北邊帥臣毋生事壬午詔天下監司郡守搜訪巖谷之士雖恢詭譎恠自晦者悉以名聞丁亥幸蔡京第己丑升晉州爲平陽壽州爲壽春齊州爲濟南府九月辛

卯朔詣玉清和陽宮上太上開天執符御曆含真體道昊天
天王皇上帝徽號寶冊丙申赦天下令洞天福地修建宮
觀塑造聖像以西內成曲赦京西己未以童貫爲開府儀
同三司冬十月乙丑太白晝見十一月丁酉朝獻景靈宮
戊戌饗太廟己亥祀昊天上帝于圜丘赦天下庚子以禮
部尚書白時中爲尚書右丞辛丑魏公材薨戊申以侯蒙
爲中書侍郎薛昂爲尚書左丞己未徙封衛國公樞爲鄆
國公增橫班爲十三階十二月己巳以婉儀劉氏爲賢妃
戊寅以熙河進築功成進執政一官乙酉奠九鼎于圜像
徽調閣劉正夫爲開府儀同三司致仕戊子以宗粹爲開

四百六
府儀同三司是歲冀州三山黃河清出宮女六百人高麗
占城大食真臘大理夏國入貢茂州夷王永壽內附

七年春正月丁酉于闐入貢庚子以殿前都指揮使高俅
爲太尉二月癸亥以大理國主段和譽爲雲南節度使大
理國王甲子會道士二千餘人于上清寶籙宮詔通真先
生林靈素諭以帝君降臨事丁卯御集英殿策高麗進士
辛未改天下天寧萬壽觀爲神霄玉清萬壽宮乙亥幸上
清寶籙宮命林靈素講道經三月庚寅賜高麗祭器高麗
進士權適等四人賜上舍及第乙未以童貫權領樞密院
丙申升鼎州爲常德軍夏四月庚申帝諷道籙院上章冊

已爲教主道君皇帝止於教門章疏內用辛酉升温州爲
應道軍五月戊子朔升慶州爲慶陽軍渭州爲平涼軍己
丑如玉清和陽宮上承天効法厚德光大后土皇地祇徽
號寶冊辛卯命蔡攸提舉秘書省并左右街道錄院乙未
詔權罷宮室修造辛丑祭地于方澤降德音于諸路以監
司州縣共爲姦賊令廉訪使者察奏仍許民徑赴尚書省
陳訴癸卯改玉清和陽宮爲玉清神霄宮六月戊午朔以
明堂成進封蔡京爲陳魯國公戊辰以嘉王楷爲太傅改
節度觀察留後爲承宣使己巳蔡京辭兩國不拜詔官其
親屬二人壬午詔禁巫覡丙戌貴妃宋氏薨秋七月壬辰

熙河環慶涇原地震庚子詔八寶增定命寶八月癸亥詔
明堂并祠五帝鄭居中以母憂去位九月戊子詔湖北民
力未紓胡耳西道可罷進築辛卯大饗明堂赦天下乙未
劉正夫卒丁酉西蕃王子益麻党征降見于紫宸殿壬寅
進宰執官一等甲辰以薛昂為特進癸丑貴妃王氏薨冬
十月乙卯朔初御明堂班朔布政戊寅侯蒙罷十一月庚
寅命蔡京五日一赴都堂治事辛卯鄭居中起復以余深
為特進少宰兼中書侍郎白時中為中書侍郎壬辰復置
醴州丙申何執中卒升石泉縣為軍十二月戊申朔有星
如月丁巳以薛昂為門下侍郎戊辰詔天神降于坤寧殿

刻石以紀之庚午以童貫領樞密命戶部侍郎孟揆作
萬歲山是歲三山河水清出宮女六十八人

重和元年春正月甲申朔受定命寶于大慶殿戊子封孫
謚爲崇國公己丑赦天下應元符末上書邪中等人依無
過人例乙巳封姪有奕爲和義郡王庚戌以翰林學士承
旨王黼爲尚書左丞二月戊辰增諸路酒價庚午遣武義
大夫馬政由海道使女真約夾攻遼甲戌升六安縣爲六
安軍丁丑詔監司輒以禁錢買物爲苞苴饋獻論以大不
恭三月丙戌詔監司郡守自今須滿三歲乃得代仍毋得
通理癸巳令嘉王楷赴廷對丙申以茂州蕃族平曲赦四

川丁酉知建昌陳弁等改建神霄宮不虔及科決道士詔
並勒傳戊戌御集英殿策進士戊申賜禮部奏名進士及
第出身七百八十三人有司以嘉王楷第一帝不欲楷先
多士遂以王昂為榜首夏四月癸丑朔築靖夏城制戎城
錄呂餘慶後癸亥減捶刑己卯詔每歲以季秋親祠明堂
如孟月朝獻禮以太上混元上德皇帝二月十五日生辰
為貞元節五月壬午朔日有食之乙酉詔諸路選漕臣一
員提舉本路神霄宮丁亥以林靈素為通真達靈元妙先
生張虛白為通元冲妙先生壬辰班御製聖濟經以青華
帝君八月九日生辰為元成節庚戌手敕兩浙漕司以權

添酒錢盡給御前工作六月乙卯以賢妃劉氏爲淑妃己巳以淮西盜平曲赦庚午慮囚甲戌以西邊獻捷曲赦陝西河東路秋七月壬午以西師有功加蔡京恩官其一子鄭居中爲少傅余深爲少保鄧洵武爲特進進執政官一等己酉遣廉訪使者六人振濟東南諸路水災八月甲寅以童貫爲太保辛酉詔班御注道德經壬申詔執政非入謝及丐去毋得獨留奏事癸酉封子椅爲嘉國公乙亥升兗州爲襲慶府九月辛巳大饗明堂壬午詔罷拘白地禁權貨增方田稅添酒價取醋息河北加折耗米東南水災彊糴等事丙戌詔太學辟雍各置內經道德經莊子列子

博士二員己丑以歲當戌月當壬為元命降德音于天下
庚寅薛昂罷以白時中為門下侍郎王黼為中書侍郎翰
林學士承旨馮熙載為尚書左丞刑部尚書范致虛為尚
書右丞壬辰禁州郡遏糴及邊將殺降以倖功賞者癸巳
禁群臣朋黨丁酉用蔡京言集古今道教事為紀志賜名
道史辛丑鄭居中罷乞持餘服詔從之詔察縣令治行諸
路監司能改正州縣事者較為殿最詔視中大夫林靈素
視中奉大夫張虛白並特授本品真官閏月庚申詔江淮
荆浙閩廣監司督責州縣還集流民丁卯進封楷為鄆王
丙子詔周柴氏後已封崇義公復立恭帝後以為宣義郎

監周陵廟世世爲國三恪冬十月己卯朔太白晝見己亥
改興慶軍爲肇慶府甲辰置道官二十六等道職八等十
一月己酉朔改元大赦天下辛亥日中有黑子丙辰以婉
容王氏爲賢妃辛酉補上書人安堯臣官己巳升梓州爲
潼川府十二月戊寅朔復京西錢監己丑置裕民局是歲
江淮荆浙梓州水出宮女百七十八人黃巖民妻一產四
男子于闐高麗入貢

本紀卷第二十一

[Faint vertical text columns, likely bleed-through from the reverse side of the page]

本紀卷第二十二

宋史二十二

開府僑言在國監國事司書表相齋國領經筵事勅裁臣朕等奉
敕修

徽宗四

宣和元年春正月戊申朔日下有五色雲壬子進建安郡
王樞為肅王文安郡王杞為景王並為太保乙卯詔佛改
號大覺金僊餘為僊人大士僧為德士易服飾稱姓氏寺
為宮院為觀改女冠為女道尼為女德丁巳金人使李善
慶來遣趙有開報聘至登州而還戊午以余深為太宰兼
門下侍郎王黼為特進少宰兼中書侍郎乙丑改滄州為

樂州癸酉封子棟為溫國公姪有恭為永寧郡王乙亥躬
耕籍田罷裕民局二月庚辰改元易宣和殿為保和殿戊
戌以鄧洵武為少保三月庚戌蔡京等進安州所得商六
鼎己未以馮熙載為中書侍郎范致虛為尚書左丞翰林
學士張邦昌為尚書右丞詔天下知宮觀道士與監司郡
縣官以客禮相見童貫遣知熙州劉法出師攻統安城夏
人伏兵擊之法敗歿震武軍受圍甲子知登州宗澤坐建
神霄宮不虔除名編管辛未賜上舍生五十四人及第甲
戌皇后親蠶夏四月丙子朔日有食之庚寅童貫以鄜延
環慶兵大破夏人平其三城己亥曲赦陝西河東路辛丑

進輔臣官一等五月丙午朔有物如龍形見京師民家丁
未詔德士並許入道學依道士法丙辰敗夏人于震武壬
申班御製九星二十八宿朝元冠服圖甲戌慮囚是月大
水犯都城西北有赤氣亘天六月壬午詔西邊武臣爲經
略使者改用文臣甲申詔封莊周爲微妙元通真君列禦
寇爲致虛觀妙真君仍行冊命配享混元皇帝己亥夏國
遣使納款詔六路罷兵秋七月甲寅以童貫爲太傅八月
戊寅詔諸路未方田處並令方量均定租課丁酉以神霄
宮成降德音于天下范致虛以母憂去位九月甲辰朔燕
蔡京於保和新殿辛亥大饗明堂癸亥幸道德院觀金芝

遂幸蔡京第丁卯以淮康軍節度使蔡攸爲開府儀同三
司冬十月甲戌朔以紹述熙豐政事書布告天下十一月
癸丑朝獻景靈宮甲寅饗太廟乙卯祀昊天上帝于圜丘
赦天下甲子詔東南諸路水災令監司郡守悉心振救戊
辰以淮甸旱飢民失業遣監察御史察訪張邦昌爲尚書
左丞翰林學士王安中爲尚書右丞時朱勔以花石綱媚
上東南騷動太學生鄧肅進詩諷諫詔放歸田里十二月
甲戌詔京東東路盜賊竊發令東西路提刑督捕之辛卯
大雨雹丙申帝數微行正字曹輔上書極論之編管郴州
是歲京西饑淮東大旱遣官振濟嵐州黃河清升邢州爲

信德陳州爲淮寧襄州爲襄陽慶州爲慶陽安州爲德安
鄆州爲東平趙州爲慶源府瀘州爲瀘川睦州爲建德岳
州爲岳陽寧州爲興寧宜州爲慶遠光州爲光山均州爲
武當軍

二年春正月癸亥追封蔡確爲汝南郡王甲子罷道學二
月乙亥遣趙良嗣使金國唐恪罷庚辰以寧遠軍節度使
梁子美爲開府儀同三司戊子令所在贍給淮南流民諭
還之甲午詔別修哲宗史三月壬寅賜上舍生二十一人
及第乙卯改熙河蘭湟路爲熙河蘭廓路夏四月丙子詔
江西廣東兩界羣盜嘯聚添置武臣提刑路分都監各一

員五月庚子朔以淑妃劉氏爲貴妃己酉日中有黑子丁巳祭地于方澤降德音于諸路布衣朱夢說上書論宦寺權太重編管池州戊辰詔宗室有文行才術者令大宗正司以聞六月癸酉詔開封府振濟飢民丁丑太白晝見戊寅蔡京致仕仍朝朔望辛巳詔自今衝改元豐法制論以大不恭丙戌詔三省樞密院額外吏職並從裁汰及有妄言惑衆稽違詔令者重論之詔諸司總轄提點之類非元豐法並罷丁亥復寺院額甲午罷禮制局并修書五十八所秋七月壬子罷文臣起復己未罷醫筭學丙寅封子棣爲英國公八月庚辰詔減定醫官額乙未詔監司所舉守

令非其人或廢法不舉令廉訪使者劾之九月壬寅金人遣勃董等來乙巳復德士為僧辛亥大饗明堂丙辰遣馬政使金國癸亥余深加少傅宴童貫第冬十月戊辰朔日有食之以河東節度使梁師成為太尉建德軍清溪妖賊方臘反命譚稹討之十一月己亥余深罷仍少傅授鎮西軍節度使知福州庚戌以王黼為少保太宰兼門下侍郎己未兩浙都監蔡遵顏坦擊方臘死之十二月丁亥改譚稹為兩浙制置使以童貫為江淮荆浙宣撫使討方臘己丑以少傅鄭居中權領樞密院庚寅詔訪兩浙民疾苦是月方臘陷建德又陷歙州東南將郭師中戰死陷杭州知

州趙震道廉訪使者趙約詬賊死是歲淮南旱夏國真臘入貢

三年春正月壬寅鄧洵武卒戊午以安康郡王栩為太保進封濟王鎮國公模為開府儀同三司進封樂安郡王已未詔淮南江東福建各權添置武臣提刑一員辛酉罷蘇杭州造作局及御前綱運乙丑罷西北兵更戍罷木石彩色等場務是月方臘陷婺州又陷衢州守臣彭汝方死之二月庚午趙震坐棄杭州貶吉陽軍罷方田甲戌降詔招撫方臘乙酉罷天下三舍及宗學辟雍諸路提舉學事官癸巳赦天下是月方臘陷處州淮南盜宋江等犯淮陽軍

遣將討捕又犯京東江北入楚海州界命知州張叔夜招
降之三月丁未御集英殿策進士庚申賜禮部奏名進士
及第出身六百三十人夏四月丙寅貴妃劉氏薨甲戌清
溪令陳光以盜發縣內棄城伏誅庚寅忠州防禦使辛興
宗擒方臘于清溪詔二浙江東被賊州縣給復三年癸巳
汝州牛生麒麟五月戊戌以鄭居中領樞密院己亥詔杭
越江寧守臣並帶安撫使甲辰追冊貴妃劉氏爲皇后謚
曰明節改睦州建德軍爲嚴州遂安軍歙州爲徽州丙午
金人再遣曷魯等來戊申以興寧軍節度使劉宗元爲開
府儀同三司癸亥詔三省覺察臺諫罔上背公者取旨譴

責陳過庭張汝霖以乞罷御前使喚及歲進花果為王黼
所劾並竄貶閏月丙寅減諸州曹掾官辛未立醫官額甲
戌復應奉司命王黼及內侍梁師成領之戊寅慮囚六月
河決恩州清河埽秋七月丁卯振溫處等八州丁亥廢純
滋等十二州戊子童貫等俘方臘以獻是月洛陽京畿訛
言有黑眚如人或如犬夜出掠小兒食之二歲乃息八月
甲辰曲赦兩浙江東福建淮南路乙巳以童貫為太師譚
稹加節度丁未柎明節皇后神主于別廟丙辰方臘伏誅
九月丙寅以王黼為少傅鄭居中為少師庚午進執政官
一等辛未大饗明堂冬十月甲寅詔自今贓吏獄具論決

勿賃童貫復領陝西兩河宣撫十一月丁丑馮熙載罷以
張邦昌爲中書侍郎王安中爲尚書左丞翰林學士承旨
李邦彥爲尚書右丞辛巳封子桐爲儀國公壬午張商英
卒十二月辛卯朔日中有黑子壬子進封廣平郡王構爲
康王樂安郡王模爲祁王並爲太保是歲諸路蝗

四年春正月丁卯以蔡攸爲少保梁師成爲開府儀同三
司癸酉金人破遼中京遼主北走二月丙申以旱禱于廣
聖宮即日雨癸卯雨雹丙午以吳國公植爲開府儀同三
司進封信都郡王三月辛酉幸秘書省遂幸太學賜祕書
少監翁彥深王時雍國子祭酒韋壽隆司業權邦彥章服

館職學官諸生恩錫有差丙子遼人立燕王淳爲帝金人
來約夾攻命童貫爲河北河東路宣撫使屯兵于邊以應
之且招諭幽燕夏四月丙午詔置補完校正文籍局錄三
館書置宣和殿及太清樓秘閣又令郡縣訪遺書五月壬
戌以高俅爲開府儀同三司丁卯封子柄爲昌國公甲戌
嗣濮王仲御薨乙亥以蔡攸爲河北河東宣撫副使庚辰
以常德軍節度使譚稹爲太尉童貫至雄州令都統制种
師道等分道進兵癸未遼人擊敗前軍統制楊可世于蘭
溝旬乙酉封開府儀同三司江夏郡王仲爰爲嗣濮王丙
戌慮囚楊可世與遼將蕭幹戰于白溝敗績丁亥辛興宗

敗于范村六月己丑种師道退保雄州遼人追擊至城下
帝聞兵敗懼甚遂詔班師壬寅以王黼爲少師是月遼燕
王淳死蕭幹等立其妻蕭氏秋七月己未廢貴妃崔氏爲
庶人壬午王黼以耶律淳死復命童貫蔡攸治兵以河陽
三城節度使劉延慶爲都統制甲申种師道責授右衛將
軍致仕和誶散官安置九月戊午朝散郎宋昭上書諫北
伐王黼大惡之詔除名勒停廣南編管己未金人遣徒孤
且烏歇等來議師期辛酉大饗明堂己巳高麗國王王俱
薨遣路允迪弔祭甲戌遣趙良嗣報聘于金國己卯遼將
郭藥師等以涿易二州來降冬十月庚寅改燕京爲燕山

府涿易八州並賜名癸巳劉延慶與郭藥師等統兵出雄
州戊戌曲赦所復州縣己亥耶律淳妻蕭氏上表稱臣納
款甲辰師次涿州己酉郭藥師與高世宣楊可世等襲燕
蕭幹以兵入援戰于城中藥師等屢敗皆棄馬縋城而出
死傷過半癸丑以蔡攸爲少傅判燕山府甲寅劉延慶自
盧溝河燒營夜遁衆軍遂潰蕭幹追至涿水上乃還十一
月丙辰朔行新璽戊辰朝獻景靈宮己巳饗太廟庚午祀
昊天上帝于園丘赦天下東南官吏昨緣寇盜貶責者並
次第移放上書邪上等人特與磨勘戊寅金人遣李靖等
來許山前六州以彰德軍節度使鄭詳爲太尉十二月丁

亥郭藥師敗蕭幹于永清縣戊子遣趙良嗣報聘于金國
庚寅以郭藥師爲武泰軍節度使辛卯金人入燕蕭氏出
奔壬辰使來獻捷乙未詔監司未經陞對毋得之任丙申
貶劉延慶爲率府率安置筠州壬寅進封植爲莘王

五年春正月戊午金人遣李靖來議所許六州代租錢已
未遣趙良嗣報聘求西京等州辛酉以王安中爲慶遠軍
節度使河北河東燕山府路宣撫使知燕山府甲申錄富
弼後二月乙酉朔以李邦彥爲尚書左丞翰林學士趙野
爲尚書右丞丙戌金人以議未合斷橋梁焚次舍丁酉進
封雍國公朴爲華原郡王徐國公棣爲高平郡王並爲開

府儀同三司三月乙卯金人再遣寧木割等來己未遣盧益報聘皆如其約夏四月癸巳金人遣楊璞以誓書及燕京涿易檀順景薊州來歸庚子童貫蔡攸入燕時燕之職官富民金帛子女先爲金人盡掠而去乙巳童貫表奏撫定燕城庚戌曲赦河北河東燕雲路是日班師五月己未以收復燕雲賜王黼玉帶庚申以王黼爲太傅鄭居中爲太保進宰執官二等辛酉王黼總治三省事癸亥童貫落節鉞進封徐豫國公蔡攸爲少師乙丑詔正位三公立本班帶節鉞若領他職者仍舊班著爲令癸酉祭地于方澤是月金人許朔武蔚三州金主阿骨打殂弟吳乞買立六

月乙酉郭藥師加檢校少傅丙戌遼人張覺以平州來附
已丑仲爰薨乙未詔今後內外宗室並不稱姓丁酉以安
國軍節度使仲理爲開府儀同三司進封嗣濮王己亥慮
囚戊申鄭居中卒辛亥以蔡攸領樞密院秋七月戊午以
梁師成爲少保己未童貫致仕起復譚稹爲河北河東燕
山府路宣撫使庚午太傅楚國公王黼等上尊號曰繼天
興道敷文成武睿明皇帝不允禁元祐學術八月辛巳朔
日當食不見辛丑命王安中作復燕雲碑壬寅太白晝見
是月蕭幹破景州薊州寇掠燕山郭藥師敗之幹尋爲其
下所殺傳首京師九月辛酉大饗明堂冬十月乙酉雨水

水壬寅罷諸路提舉常平之不職者十一月乙卯以鄭紳
爲太師丙寅幸王黼第觀芝諸路漕臣坐上供錢物不足
貶秩者二十二人丁卯王安中譚稹並加檢校少傅郭藥
師爲太尉華原郡王朴薨壬申王黼子弟親屬推恩有差
是月金人取平州張覺走燕山金人索之甚急命王安中
縊殺函其首送之十二月乙巳金人遣高居慶等來賀正
旦戊申以高平郡王棣爲太保進封徐王是歲秦鳳旱河
北京東淮南饑遣官振濟

六年春正月乙卯爲金主輟朝戊午置書藝所癸亥藏蕭
幹首于大社戊寅遣連南夫弔祭金國二月丁亥以冀國

公樛爲開府儀同三司進封河間郡王韶州防禦使令盪
爲婺州觀察使封安定郡王己亥躬耕藉田丙午詔自今
非歷臺閣寺監監司郡守開封府曹官者不得爲郎官卿
監著爲令李邦彥以父憂去位三月己酉朔以錢景臻爲
少師金人來勾糧不與閏月辛巳皇后親蠶庚子御集英
殿策進士夏四月癸丑賜禮部奏名進士及第出身八百
五人丁巳李邦彥起復五月壬寅慮囚癸卯金人遣使來
告嗣位六月壬子詔以收復燕雲以來京東兩河之民困
於調度令京西淮浙江湖四川閩廣並納免夫錢期以兩
月納足違者從軍法秋七月戊子遣許亢宗賀金國嗣位

丁酉詔應係御筆斷罪不許詣尚書省陳訴改正壬寅詔
宗室后妃戚里宰執之家槩敷免夫錢甲辰置璣衡所八
月乙卯譚稹落太尉罷宣撫使童貫落致仕領樞密院代
之丁巳以溢機堡爲安羌城壬戌以復燕雲赦天下九月
乙亥以白時中爲特進太宰兼門下侍郎李邦彥爲少宰
兼中書侍郎蔡攸落節鉞辛巳大饗明堂丁亥以趙野爲
尚書左丞翰林學士承旨宇文粹中爲尚書右丞開封尹
蔡懋同知樞密院庚寅以金芝產于良嶽萬壽峰改名壽
岳庚子金人遣富謨弼等以遺留物來獻冬十月庚午詔
有收藏習用蘇黃之文者並令焚毀犯者以大不恭論癸

酉詔內外官並以三年爲任治績著聞者再任求爲式十
一月丙子王黼致仕太白晝見乙酉罷應奉司丙戌令尚
書省置講議局壬辰詔監司擇縣令有治績者保奏召赴
都堂審察錄用毋過三人十二月甲辰朔祭京領講議司
詔百官遵行元豐法制丁未詔內外侍從以上各舉所知
二人癸亥祭京落致仕領三省事是歲河北山東盜起命
內侍梁方平討之京師河東陝西地大震兩河京東西浙
西水環慶邠寧涇原流徙令所在振恤夏國高麗于闐羅
殿入貢

七年春正月癸酉朔詔赦兩河京西流民爲盜者仍給復

一年癸巳詔罷諸路提舉常平官屬有罪當黜者以名聞仍令三省修已廢之法二月甲辰復置鑄錢監詔御史察贓吏已酉兩木冰庚戌詔京師運米五十萬斛至燕山令工部侍郎孟揆親往措置巳巳進封廣國公棻爲南康郡王福國公榛爲平陽郡王並開府儀同三司壬申京東轉運副使李孝昌言招安羣盜張萬仙等五萬餘人詔補官犒賜有差三月癸酉朔兩雹甲申知海州錢伯言奏招降山東寇賈進等十萬人詔補官有差丙戌以惠國公棧爲開府儀同三司進封建安郡王夏四月丙辰降德音于京東河北路庚申蔡京復致仕復州縣免行錢戊辰詔行元

豐官制復尚書令之名虛而勿授三公但爲階官毋領三省事五月壬午封子縱爲潤國公丁亥詔諸路帥臣舉將校有才略者監司舉守令有政績者歲各三人六月辛丑朔詔宗室復著姓丙午封童貫爲廣陽郡王戊申詔臣僚輒與內侍來往者論罪辛亥慮囚己未以蔡攸爲太保癸亥詔吏職雜流出身人毋得陳請改換乙丑罷減六尚歲貢物秋七月庚午朔詔士庶毋以天王君聖爲名字及以壬戌日輔臣焚香甲戌以河間郡王楞爲太保進封沂王是月河東義勝軍叛熙河河東路地震九月辛巳大饗明堂壬辰金人以擒遼主遣李孝和等來告慶是月河東言

粘罕至雲中詔童貫復宣撫有狐升御榻而坐冬十月辛亥賜曾布謚曰文肅戊午罷京畿和糴十一月庚午詔無出身待制以上年及三十通歷任滿十歲乃許任子乙亥遣使回慶金國甲申朝獻景靈宮乙酉饗太廟丙戌祀昊天上帝于園丘赦天下庚寅以保靜軍節度使种師道爲河東河北路制置使十二月乙巳童貫自太原遁歸京師已酉中山奏金人斡离不粘罕分兩道入攻郭藥師以燕山叛北邊諸郡皆陷又陷忻代等州圍太原府太常少卿傅察奉使不屈死之丙辰罷浙江諸路花石綱延福宮西城租課及內外製造局金兵犯中山府詹度禦之戊午皇

太子桓爲開封牧罷修蕃行北宅令諸皇子分居十位已
未下詔罪已令中外直言極諫郡邑率師勤王募草澤異
才有能出奇計及使疆外者罷道官罷大晟府行幸局西
城及諸局所管緡錢盡付有司以保和殿大學士宇文虛
中爲河北河東路宣諭使庚申詔內禪皇太子即皇帝位
尊帝爲教主道君太上皇帝居于龍德宮尊皇后爲太上
皇后靖康元年正月己巳詣亳州太清宮行恭謝禮遂幸
鎮江府四月己亥還京師明年二月丁卯金人脅帝北行
紹興五年四月甲子崩于五國城年五十有四七年九月
甲子凶問至江南遙上尊謚曰聖文仁德顯孝皇帝廟號

徽宗十二年八月乙酉梓宮還臨安十月丙寅權檮于永
祐陵十二月丁卯祔太廟第十一室十三年正月己亥加
上尊謚曰體神合道駿烈遜功聖文仁德憲慈顯孝皇帝
贊曰宋中葉之禍章蔡首惡趙良嗣厲階然哲宗之崩徽
宗未立惇謂其輕佻不可以君天下遼天祚之亡張覺舉
平州來歸良嗣以爲納之失信於金必啓外侮使二人之
計行宋不立徽宗不納張覺金雖強何釁以伐宋哉以是
知事變之來雖小人亦能知之而君子有所不能制也跡
徽宗失國之由非若晉惠之愚孫皓之暴亦非有曹馬之
篡奪特恃其私智小慧用心一偏踈斥正士狎近姦諛於

是蔡京以猥薄巧佞之資濟其驕奢淫佚之志溺信虛無
崇飾游觀困竭民力君臣逸豫相爲誕謾怠棄國政日行
無稽及童貫用事又佳兵勤遠稔禍速亂他日國破身辱
遂與石晉重貴同科豈得諉諸數哉昔西周新造之邦召
公猶告武王以不作無益害有益不貴異物賤用物况宣
政之爲宋承熙豐紹聖榘喪之餘而徽宗又躬蹈二事之
弊乎自古人君玩物而喪志縱欲而敗度鮮不亡者徽宗
甚焉故特著以爲戒

本紀卷第二十二



本紀卷第二十三

宋史二十三

開府儀同三司柱國錄軍國重事前書右丞相監修國史領經筵事都總裁_臣脫等奉

勅修

欽宗

欽宗恭文順德仁孝皇帝諱桓徽宗皇帝長子母曰
恭顯皇后王氏元符三年四月己酉生于坤寧殿初
名亶封韓國公明年六月進封京兆郡王崇寧元年
二月甲午更名烜十一月丁亥又改今名大觀二年
正月進封定王政和元年三月講學于資善堂三年
正月加太保四年二月癸酉冠于文德殿五年二月

乙巳立為皇太子大赦天下丁巳謁太廟詔乘金輅
設鹵簿如至道天禧故事及宮僚參謁並稱臣皆辭
之六年六月癸未納妃朱氏宣和七年十二月戊午
除開封牧庚申徽宗詔皇太子嗣位自稱曰道君皇
帝趣太子入禁中被以御服泣涕固辭因得疾又固
辭不許辛酉即皇帝位御垂拱殿見群臣是日日有
五色暈挾赤黃珥重日相蕩摩久之乃引道君皇帝
出居龍德宮皇帝出居擷景園以少宰李邦彥為龍
德宮使太保領樞密院事蔡攸門下侍郎吳敏副之
是時金人已分道犯境壬戌赦大逆反叛以下罪進

百官秩一等賞諸軍立妃朱氏為皇后以太子詹事
耿南仲簽書樞密院事癸亥詔太傅燕王越王入朝
不趨贊拜不名詔非三省樞密院所得旨有司勿行
甲子幹離不陷信德府粘罕圍太原詔京東淮西浙
募兵入衛太學生陳東等上書數蔡京童貫王黼梁
師成李彦宗劾罪謂之六賊請誅之丙寅上道君皇
帝尊號曰教主道君太上皇帝皇后曰道君太上皇
后詔改元

靖康元年春正月丁卯朔受群臣朝賀退詣龍德宮
賀道君皇帝詔中外臣庶實封言得失金人破相州

戊辰破濟州威武軍節度使梁方平師潰河北河東
路制置副使何灌退保滑州已巳灌奔還金入濟河
詔親征道君皇帝東巡以領樞密院事蔡攸為行宮
使尚書左丞宇文粹中副之詔自今除授黜陟及恩
數等事並參酌祖宗舊制罷內外官司局所一百五
處止留後苑以奉龍德宮以門下侍郎吳敏知樞密
院事吏部尚書李昫同知樞密院事貶太傅致仕王
黼為崇信軍節度副使安置永州賜翊衛大夫安德
軍承宣使李彥死並籍其家放寧遠軍節度使朱勔
歸田里帝欲親征以李綱為留守以李昫為副給事

中王寓諫親征罷之庚午道君皇帝如亳州百官多
潛遁宰相欲奉帝出襄鄧李綱諫止之以綱爲尚書
右丞辛未以李綱爲親征行營使侍衛親軍馬軍都
指揮使曹矇副之太宰兼門下侍郎白時中罷李邦
彥爲太宰兼門下侍郎守中書侍郎張邦昌爲少宰
兼中書侍郎尚書左丞趙野爲門下侍郎翰林學士
承旨王孝迪爲中書侍郎同知樞密院事蔡懋爲尚
書左丞壬申金人渡河遣使督諸道兵入援癸酉詔
兩省樞密院官制一遵元豐故事金人犯京師命尚
書駕部員外郎鄭望之親衛大夫康州防禦使高世

則使其軍詔從官舉文武臣僚堪充將帥有膽勇者
是夜金人攻宣澤門李綱禦之斬獲百餘人至旦始
退甲戌金人遣吳孝民來議和命李揆使金軍金人
又使蕭三寶奴耶律忠張愿恭來以吏部尚書唐恪
同知樞密院事乙亥金人攻通津景陽等門李綱督
戰自卯至酉斬首數千級何灌戰死李揆與蕭三寶
奴耶律忠王訥來索金帛數千萬且求割太原中山
河間三鎮并宰相親王爲質乃退師丙子避正殿減
常膳括借金銀籍倡優家財庚辰命張邦昌副康王
構使金軍詔稱金國加大字辛巳道君皇帝幸鎮江

以兵部尚書路允迪簽書樞密院事金人陷陽武知縣事蔣興祖死之壬午大風走石竟日乃止封子諶爲大寧郡王甲申省廉訪使者官罷鈔旁定貼錢及諸州免行錢以諸路贍學戶絕田產歸常平司統制官馬忠以京西募兵至擊金人于順天門外敗之乙酉路允迪使黏罕軍于河東平陽府將劉嗣初以城叛丁亥靖難軍節度使河北河東路制置使种師道督涇原秦鳳兵入援以師道同知樞密院事爲京畿河北河東宣撫使統四方勤王兵及前後軍庚寅盜殺王黼于雍丘癸巳大霧四塞乙未賤少保淮南節

度使梁師成爲彰化軍節度副使行及八角鎮賜死
二月丁酉朔命都總制姚平仲將兵夜襲金人軍不
克而奔戊戌罷李綱以謝金人廢親征行營司金人
復來議和庚子命駙馬都尉曹晟使金軍辛丑又命
資政殿大學士宇文虛中知東上閣門事王球使之
許割三鎮地太學諸生陳東等及都民數萬人伏闕
上書請復用李綱及种師道且言李邦彥等疾綱恐
其成功罷綱正墮金人之計會邦彥入朝衆數其罪
而罵吳敏傳宣衆不退遂搥登聞鼓山呼動地殿帥
王宗濂恐生變奏上勉從之遣耿南仲號於衆曰己

得旨宣綱矣內侍朱拱之宣綱後期衆鬱而磔之并
殺內侍數十人乃復綱右丞充京城防禦使壬寅追
封范仲淹魏國公贈司馬光太師張商英太保除元
祐黨籍學術之禁詔誅士民殺內侍爲首者禁伏闕
上書廢苑囿宮觀可以與民者金人使王訥來癸卯
命肅王樞使金軍以觀文殿學士大名尹徐處仁爲
中書侍郎宇文虛中簽書樞密院事蔡懋罷乙巳字
文虛中王球復使金軍康王至自金軍金人遣韓光
裔來告辭遂退師京師解嚴丙午康王構爲太傅靜
江奉寧軍節度使省明堂班朔布政官丁未日有兩

珥戍申赦天下詔諭士民自今庶事並遵用祖宗舊制凡蠹國害民之事一切寢罷己酉罷宰執兼神霄玉清萬壽宮使及殿中監符寶郎詔用祖宗故事擇武臣得軍心者爲同知簽書樞密院邊將有威望者爲三衙以金人請和詔官民昔嘗附金而復歸本朝者各還其鄉國庚戌李邦彥罷以張邦昌爲太宰兼門下侍郎吳敏爲少宰兼中書侍郎李綱知樞密院事耿南仲爲尚書左丞李昉爲尚書右丞辛亥詔監察御史言事如祖宗法宇文粹中罷知江寧府癸丑种師道罷爲中太一宮使贈右正言陳瓘爲右諫議

大夫甲寅貶太師致仕蔡京爲秘書監分司南京太師廣陽郡王童貫爲左衛上將軍太保領樞密院事蔡攸爲太中大夫提舉亳州明道宮先是粘罕遣人來求賂大臣以勤王兵大集拘其使人且結約余覩以圖之至是粘罕怒及攻太原不克分兵趣京師過南北關權威勝軍李植以城降乙卯陷隆德府知府張確通判趙伯臻司錄張彥通死之丙辰有二流星一出張宿入濁没一出北河入軫己未詔遙郡承宣使有功應除正任者自今除正任刺史辛酉梁方平坐棄河津伏誅王孝迪罷命給事中王雲侍衛親軍

馬軍都指揮使曹瑁使金國鎮洮軍節度使中太乙
宮使种師道為河南河東路宣諭使保靜軍節度使
前副都指揮使姚古為制置使乙丑御殿復膳丙寅
下哀痛之詔于陝西河東是月金人犯澤州之高平
知州高世由往犒之乃去三月丁卯朔遣徽猷閣待
制宋煥奉表道君皇帝行宮詔侍從言事詔非三省
樞密院所奉旨諸司不許奉行罷川路歲所遣使募
人掩軍民遺骸遣使分就四郊致祭戊辰李昉罷為
鴻慶宮使己巳張邦昌罷為中太一宮使徐處仁為太
宰兼門下侍郎唐恪為中書侍郎翰林學士何臬為

尚書右丞御史中丞許翰同知樞密院事庚午宇文
虛中罷知青州癸酉詣景靈東宮行恭謝禮命趙野
爲道君皇帝行宮奉迎使甲戌恭謝景靈西宮及建
隆觀乙亥詣陽德觀凝祥池中太一宮佑神觀相國
寺丙子改擷景園爲寧德宮錄司馬光後已卯燕王
俱越王偲爲太師壬午詔金人叛盟深入其元主和
議李邦彥奉使許地李枕李鄴鄭望之悉行罷黜又
詔种師道姚古种師中往援三鎮保塞陵寢所在誓
當固守癸未遣李綱迎道君皇帝于南京以徐處仁
爲禮儀使殿中侍御史李擢左司諫李會罷乙酉迎

道君皇帝于宜春苑太后入居寧德宮丙戌知中山
府詹度爲資政殿大學士知太原府張孝純知河間
府陳邁並爲資政殿學士知澤州高世由直龍圖閣
賞城守之勞也丁亥朝于寧德宮詔扈從行宮官吏
候還京日優加賞典除有罪之人迫於公議已行遣
外餘令臺諫勿復用前事糾言庚寅肅王樞爲太傅
姚古復隆德府辛卯復威勝軍壬辰太保景王杞濟
王栩爲太傅有流星出紫微垣甲午康王構爲集慶
建雄軍節度使尚書戶部侍郎錢蓋爲陝西制置使
命陳東初品官賜同進士出身辭不拜籍朱勔家乙

未詔金歸朝官民未發遣者止之丙申貶蔡京為崇
信軍節度副使是春夏人取天德雲內武州及河東
八館夏四月戊戌夏人陷鎮威城攝知城事朱昭死
之己亥迎太上皇帝入都門壬寅朝于龍德宮癸卯
立子諶為皇太子耿南仲為門下侍郎乙巳置春秋
博士戊申置詳議司於尚書省討論祖宗法己酉乾
龍節群臣上壽于紫宸殿庚戌趙野罷壬子金人使
賈寔冉企弓來癸丑封太師沂國公鄭紳為樂平郡
王貶童貫為昭化軍節度副使安置郴州減宰執俸
給三之一及支賜之半詔開經筵令吏部稽考庶官

凡由楊戩李彥之公田王黼朱勳之應奉童貫西北
之師孟昌齡河防之役夔蜀湖南之開疆關陝河東
之改幣及近習所引獻頌可采特赴殿試之流所得
爵賞悉奪之甲寅种師道加太尉同知樞密院事河
北河東路宣撫使乙卯詔自今假日特坐百司毋得
休務以平涼軍節度使范訥為右金吾衛上將軍丙
辰詔有告姦人妄言金人復至以恐動居民者賞之
戊午進封南康郡王棊為和王平陽郡王榛為信王
己未復以詩賦取士禁用莊老及王安石字說壬戌
詔親擢臺諫官宰執勿得薦舉著為令追政和以來

道官處士先生封贈奏補等敕書甲子今在京監察
御史在外監司郡守及路分鈐轄已上舉曾經邊任
或有武勇可以統衆出戰者二員東兵正將占沆
與金人戰于交城縣死之乙丑詔三衙并諸路帥司
各舉諳練邊事智勇過人并豪俊竒傑衆所推服堪
充統制將領者各五名貶蔡攸節度副使安置朱勔
于循州五月丙寅朔朝于龍德宮令提舉官日具太
上皇帝起居平安以聞丁卯詔天下有能以財穀佐
軍者有司以名聞推恩有差以少傅鎮西軍節度余
深為特進觀文殿大學士戊辰罷王安石配享孔子

廟庭庚午少傅安武軍節度使錢景臻鎮安軍節度使開府儀同三司劉宗元並為左金吾衛上將軍保信軍節度使劉敷武成軍節度使劉敏嚮德軍節度使張搯岳陽軍節度使王舜臣應道軍節度使朱孝孫瀘川軍節度使錢忱並為右金吾衛上將軍是日寒幸未申銅禁詔無出身待制已上年及三十而通歷任實及十年者乃得任子監察御史余應求坐言事迎合大臣罷知衛州甲戌曲赦河北路乙亥申銷金禁丁丑詔以儉約先天下澄冗汰貪為民除害授監司郡縣奉行所未及者凡十有六事姚古將兵至

威勝聞粘罕將至衆驚潰河東大振河北河東路制
置副使种師中與金人戰于榆次死之己卯借外任
官職田一年開府儀同三司高俅卒辛巳損太官日
進膳追削高俅官甲申罷詳議司己丑以河東經略
安撫使張孝純爲檢校少保武當軍節度使壬辰詔
天下舉習武藝兵書者乙未詔姚古援太原六月丙
申朔以道君皇帝還朝御紫宸殿受群臣朝賀詔諫
官極論闕失戊戌令中外舉文武官才堪將帥者時
太原圍急群臣欲割三鎮地李綱沮之乃以李綱代
种師道爲宣撫使援太原辛丑以資政殿學士劉韜

爲宣撫副使陝西制置司都統制解潛爲制置副使
太白犯歲星壬寅封鄆國公握爲安康郡王韓國公
捷爲廣平郡王并開府儀同三司詔今日政令惟遵
奉上皇詔書修復祖宗故事群臣庶士亦當講孔孟
之正道察安石舊說之不當者羽翼朕志以濟中興
癸卯以侍衛親軍馬軍副都指揮使鎮西軍承宣使
王稟爲建武軍節度使錄堅守太原之功也甲辰路
允迪罷爲醴泉觀使乙巳左司諫陳公輔以言事責
監合州酒務壬子天狗墜地有聲如雷癸丑慮囚丙
辰太白熒惑歲鎮四星合於張辛酉罷都水將作監

承授內侍官熙河都統制焦安節坐不法李綱斬之
壬戌姚古坐擁兵逗遛貶爲節度副使安置廣州
出紫微垣秋七月乙丑朔除元符上書邪等之禁宋
昭政和中上書諫攻遼貶連州庚午詔赴都堂乙亥
安置蔡京于儋州攸雷州童貫吉陽軍已卯免借河
北河東陝西路職田乙酉詔蔡京子孫二十三人已
分竄遠地遇赦不許量移是日京死于潭州丁亥令
侍從官共議改修宣仁聖烈皇后謗史辛卯遣監察
御史張澂誅童貫廣西轉運副使李昇之誅趙良嗣
並竄其子孫于海南壬辰侍御史李光遠坐言事貶

監當是月解潛與金人戰于南關敗績劉韜自遼州
引兵與金人戰敗績八月甲午朔錄陳瓘後丙申復
命种師道以宣撫使巡邊召李綱還庚子詔以彗星
避殿減膳令從臣具民間疾苦以聞河東察訪使張
灝與金人戰于文水敗績辛丑詔求民之疾苦者十
七事悉除之丁未幹離不復攻廣信軍保州不克遂
犯真定戊申都統制張思正等夜襲金人于文水縣
敗之己酉復戰師潰死者數萬人思正奔汾州都統
制折可求師潰于子夏山威勝隆德汾晉澤絳民皆
渡河南奔州縣皆空金人乘勝攻太原錄張庭堅後

乙卯遣徽猷閣待制王雲閣門宣贊舍人馬識遠使于金國秘書著作佐郎劉岑太常博士李若水分使其軍議和戊午許翰罷知亳州己未太宰徐處仁罷知東平少宰吳敏罷知揚州以唐恪爲少宰兼中書侍郎何臬爲中書侍郎禮部尚書陳過庭爲尚書右丞開封尹聶昌同知樞密院事御史中丞李回簽書樞密院事庚申遣王雲使金軍許以三鎮賦稅是月福州軍亂殺其知州事柳庭俊九月丙寅金人陷太原執安撫使張孝純副都總管王稟通判方笈皆死之辛未貶吳敏爲崇信軍節度副使安置涪州移蔡

攸于萬安軍尋與弟脩及朱勔皆賜死乙亥詔編脩
敕令所取靖康以前蔡京所乞御筆手詔參祖宗法
及今所行者刪修成書丁丑禮部尚書王寓爲尚書
左丞戊寅有赤氣隨日出李綱罷知揚州壬午梟童
貫首于都市癸未賜布衣尹焞爲和靖處士甲申日
有兩珥背氣丙戌建三京及鄧州爲都總管府分總
四道兵庚寅以知大名府趙野爲北道都總管知河
南府王襄爲西道都總管知鄧州張叔夜爲南道都
總管知應天府胡直孺爲東道都總管又罷李綱提
舉洞霄宮辛卯遣給事中黃鑄由海道使金國議和

是月夏人陷西安州冬十月癸巳朔御殿復膳貶李
綱爲保靜軍節度副使安置建昌軍丁酉金人陷真
定都鈐轄劉靖死之有流星如杯戊戌金人使楊天
吉王訥來庚子日有青赤黃戴氣金人陷汾州知州
張克戩兵馬都監賈宣死之又攻平定軍辛丑下哀
痛詔命河北河東諸路帥臣傳檄所部得便宜行事
壬寅天寧節率群臣詣龍德宮上壽甲辰詔用蔡京
王黼童貫所薦人丙午集從官于尚書省議割三鎮
召种師道還丁未以禮部尚書馮澥知樞密院事已
酉闕砲飛山營庚戌以范訥爲寧武軍節度使河北

河東路宣撫使遼故將小鞠鞞攻陷麟州建寧砦知
砦楊震死之壬子詔太常禮官集議金主尊號命尚
書左丞王寓副康王使幹離不軍寓辭乙卯雨水
丙辰金人陷平陽府又陷威勝隆德澤州丁巳高麗
入貢令明州遞表以進遣其使還戊午貶王寓爲單
州團練副使命馮澥代行庚申日有兩珥及背氣侍
御史胡舜陟請援中山不省辛酉种師道薨十一月
丙寅夏人陷懷德軍知軍事劉銓通判杜翊世死之
籍譚稹家戊辰康王未至金軍而還馮澥罷己巳集
百官議三鎮棄守庚午詔河北河東京畿清野令流

民得占官舍寺觀以居辛未有流星如杯壬申禁京
師民以浮言相動者癸酉右諫議大夫范宗尹以首
議棄地罷金人至河外宣撫副使折彥質領師十二
萬拒之甲戌師潰金人濟河知河陽燕瑛西京留守
王襄棄城遁乙亥命刑部尚書王雲副康王使幹離
不軍許割三鎮奉袞冕車輅尊其主爲皇叔且上尊
號丙子金人度河折彥質兵盡潰提刑許高兵潰于
洛口金人來言欲盡得河北地京師戒嚴遣資政殿
學士馮澥及李若水使粘罕軍丁丑何臬罷以尚書
左丞陳過庭爲尚書侍郎兵部尚書孫傅爲尚書右

丞命成忠郎郭京領選六甲正兵所簽書樞密院事
李回以萬騎防河衆潰而歸是日塞京城門戊寅進
龍德宮婉容韋氏爲賢妃康王構爲安國安武軍節
度使罷清野辛巳以知懷州霍安國爲徽猷閣待制
通判林淵直徽猷閣賞守禦之功也壬午幹離不使
揚天吉王訥勅董撒離拇來命耿南仲使幹離不軍
聶昌使粘罕軍許畫河爲界康王至磁州州人殺王
雲止王勿行王復還相州甲申以尚書右丞孫傅同
知樞密院事御史中丞曹輔簽書樞密院事以京兆
府路安撫使范致虛爲陝西五路宣撫使令督勤王

兵入援乙酉幹離不軍至城下遣蠟書間行出關召
兵又約康王及河北守將來援多爲邏兵所獲丁亥
大風發屋折木李回罷戊子金人攻通津門范瓊出
兵焚其砦己丑南道總管張叔夜將兵勤王至玉津
園以叔夜爲延康殿學士幹離不遣劉晏來庚寅幸
東壁勞軍詔三省長官名悉依元豐舊制領開封府
何臬爲門下侍郎閏月壬辰朔金人攻善利門統制
姚仲友禦之奇兵作亂殺使臣王宗濂斬數十人乃
定唐恪出都人欲擊之因求去罷爲中太一宮使以
門下侍郎何臬爲尚書左僕射兼中書侍郎劉詒坐

棄軍降五官子祠癸巳京師苦寒用日者言借土牛
迎春朱伯友坐棄鄭州降三官罷西道總管王襄棄
西京去知澤州高世由以城降于金燕瑛欲棄河陽
爲亂兵所殺河東諸郡或降或破殆盡都民殺東壁
統制官辛亢宗罷民棄城代以保甲黏罕軍至城下
甲午時雨雪交作帝被甲登城以御膳賜士卒易火
飯以進人皆感激流涕金人攻通津門數百人縋城
禦之焚其砲架五鵝車二驛召李綱爲資政殿大學
士領開封府金人陷懷州霍安國林淵及其鈐轄張
彭年都監趙士訥張諶皆死之乙未金人入青城攻

朝陽門馮澥與金人蕭慶揚真誥來丙申帝幸宣化
門以障泥乘馬行泥淖中民皆感泣張叔夜數戰有
功帝如安上門召見拜資政殿學士金人執胡直孺
又陷拱州丁酉赤氣亘天以馮澥爲尚書左丞戊戌
殿前副都指揮使王宗濬與金人戰于城下統制官
高師旦死之庚子以資政殿學士張叔夜簽書樞密
院事金人攻宣化門姚仲友禦之辛丑金人攻南壁
殺傷相當壬寅詔河北守臣盡起軍民兵倍道入援
癸卯金人攻南壁張叔夜范瓊分兵襲之遙見金兵
奔還自相蹈藉溺隍死者以千數甲辰大雨雪金人

陷亳州遣間使召諸道兵勤王乙巳大寒士卒噤戰不能執兵有僵仆者帝在禁中徒跣祈晴時勤王兵不至城中兵可用者惟衛士三萬然亦十失五六金人攻城急丙午雨水冰丁未始避正殿己酉遣馮澥曹輔與宗室仲溫士詭使金軍請和命康王爲天下兵馬大元帥速領兵入衛辛亥金人來議和要親王出盟壬子金人攻通津宣化門范瓊以千人出戰渡河水裂沒者五百餘人自是士氣益挫甲寅大風自北起俄大雨雪連日夜不止乙卯金人復使劉晏來趣親王宰相出盟丙辰妖人郭京用六甲法盡令守

禦人下城大啓宣化門出攻金人兵大敗京託言下
城作法引餘兵遁去金兵登城衆皆披靡金人焚南
薰諸門姚仲友死于亂兵宦者黃經國赴火死統制
官何慶言陳克禮中書舍人高振力戰與其家人皆
被害秦元領保甲斬關遁京城陷衛士入都亭驛執
劉晏殺之丁巳奉道君皇帝寧德皇后入居延福宮
命何臬及濟王栩使金軍戊午何臬入言金人邀上
皇出郊帝曰上皇驚憂而疾必欲之出朕當親往自
乙卯雪不止是日霽夜有白氣出太微彗星見庚申
日赤如火無光辛酉帝如青城十二月壬戌朔帝在

青城蕭慶入居尚書省是日康王開大元帥府于相
州癸亥帝至自青城甲子大索金帛丙寅遣陳過庭
劉韜使兩河割地辛未定京師米價勸糶以振民癸
酉斬行門指揮使蔣宣李福乙亥康王如北京丙子
尚書省火庚辰雨雹癸未大雪寒縱民伐紫筠館花
木爲薪庚寅康王如東平

二年春正月辛卯朔命濟王栩景王杞出賀金軍金
人亦遣使入賀壬辰金人趣召康王還遣聶昌耿南
仲陳過庭出割兩河地民堅守不奉詔凡累月止得
石州甲午詔兩河民開門出降乙未有大星出建星

西南流入于濁没丁酉雨木冰己亥陰曠風迅發夜
西北陰雲中有如火光庚子金人索金銀急何臬李
若水勸帝親至軍中從之以太子監國而行乙巳籍
梁師成家丙午劉韜自經于金軍太學生徐揆上書
乞守門請帝還闕金人取至軍中揆抗論爲所殺至
夜金人劫神衛營丁未大霧四塞金人下含輝門剽
掠焚五岳觀二月辛酉朔帝在青城自如金軍都人
出迎駕丙寅金人塹南薰門路人心大恐已而金人
令推立異姓孫傳方號慟乞立趙氏不允丁卯金人
要上皇如青城以內侍鄧述所具諸王孫名盡取入

軍中辛未金人逼上皇召皇后皇太子入青城庚辰
康王如濟州癸未觀文殿大學士唐恪仰藥自殺乙
酉金人以括金未足殺戶部尚書梅執禮侍郎陳知
質刑部侍郎程振給事中安扶三月辛卯朔帝在青
城丁酉金人立張邦昌為楚帝庚子金人來取宗室
開封尹徐秉哲令民結保毋藏匿丁巳金人脅上皇
北行夏四月庚申朔大風吹石折木金人以帝及皇
后皇太子北歸凡法駕鹵簿皇后以下車輅鹵簿冠
服禮器法物大樂教坊樂器祭器八寶九鼎圭璧渾
天儀銅人刻漏古器景靈宮供器太清樓秘閣三館

書天下州府圖及官吏內人內侍技藝工匠娼優府庫畜積爲之一空辛酉北風大起苦寒五月庚寅朔康王即位于南京遙上尊號曰孝慈淵聖皇帝紹興三十一年五月辛卯帝崩問至七月己丑上尊謚曰恭文順德仁孝皇帝廟號欽宗三十二年閏二月戊寅祔于太廟

贊曰帝在東宮不見失德及其踐阼聲技音樂一無所好靖康初政能正王黼朱勔等罪而竄殛之故金人聞帝內禪將有卷甲北旆之意矣惜其亂勢已成不可救藥君臣相視又不能同力協謀以濟斯難惴

惴然講和之不暇卒致父子淪胥社稷蕪第帝至於
是蓋亦異懦而不知義者歟享國日淺而受禍至深
考其所自真可悼也夫真可悼也夫

本紀卷第二十三

三十一平五日辛卯帝崩閏至十月己丑土尊益曰

三十一平五日辛卯帝崩閏至十月己丑土尊益曰

三十一平五日辛卯帝崩閏至十月己丑土尊益曰

三十一平五日辛卯帝崩閏至十月己丑土尊益曰

本紀卷第二十四

宋史二十四

閣儀司上柱國錄軍國事兼書丞和監修國史領經筵事都總裁臣脫等奉

勅修

高宗一

高宗受命中興全功至德聖神武文昭仁憲孝皇帝諱構字德基徽宗第九子母曰顯仁皇后韋氏大觀元年五月乙巳生東京之大內赤光照室八月丁丑賜名授定武軍節度使檢校太尉封蜀國公二年正月庚申封廣平郡王宣和三年十二月壬子進封康王資性朗悟博學彊記讀書日誦千餘言挽弓至一

石五斗宣和四年始冠出就外第靖康元年春正月
金人犯京師軍于城西北遣使入城邀親王宰臣議
和軍中朝廷方遣同知樞密院事李昉等使金議割
太原中山河間三鎮遣宰臣授地親王送大軍過河
欽宗召帝諭指帝慷慨請行遂命少宰張邦昌爲計
議使與帝俱金帥幹離不留之軍中旬日帝意氣間
暇二月會京畿宣撫司都統制姚平仲夜襲金人砦
不克金人見責邦昌恐懼涕泣帝不爲動幹離不異
之更請肅王癸卯肅王至軍中許割三鎮地進邦昌
爲太宰留質軍中帝始得還金兵退復遣給事中王

雲使金以租賦贖三鎮地又以蠟書結遼降將耶律
余覩爲金人所得八月金帥黏罕復引兵深入陷太
原幹離不破真定冬十月王雲從吏自金先還言金
人須帝再至乃議和雲歸言金人堅欲得地不然進
兵取汴都十一月詔帝使河北奉袞冕玉輅尊金主
爲伯上尊號十八字被命即發京師以門下侍郎耿
南仲主和議請與俱乃以其子中書舍人延禧爲叅
議官偕行帝由滑濟至磁州守臣宗澤請曰肅王去
不返金兵已迫復去何益請留磁磁人以雲將挾帝
入金遂殺雲時黏罕幹離不已率兵渡河相繼圍京

師從者以磁不可留知相州汪伯彥亦以蠟書請帝
還相州閏月耿南仲馳至相見帝致辭以面受欽宗
之旨盡起河北兵入衛帝乃同南仲募兵勤王初朝
廷聞金兵渡河欲拜帝爲元帥至是殿中侍御史胡
唐老復申元帥之議尚書右僕射何臬擬詔書以進
欽宗遣閣門祗候秦仔持蠟詔至相拜帝爲河北兵
馬大元帥知中山府陳亨伯爲元帥汪伯彥宗澤爲
副元帥仔於頂髮中出詔帝讀之嗚咽兵民感動十
二月壬戌朔帝開大元帥府有兵萬人分爲五軍命
武顯大夫陳淬都統制軍馬閣門祗候侯章齎蠟書

至自京師詔帝盡發河北兵命守臣自將帝乃下令
諸郡守與諸將議引兵渡河乙亥帝率兵離相州丙
子履水渡河丁丑次大名府宗澤以二千人先諸軍
至知信德府梁揚祖以三千人繼至張俊苗傅楊沂
中田師中皆在麾下兵威稍振會簽書樞密院事曹
輔齋蠟詔至云金人登城不下方議和好可屯兵近
甸毋輕動汪伯彥等皆信和議惟宗澤請直趨澶淵
爲壁次第解京城之圍伯彥南仲請移軍東平帝遂
遣澤以萬人進屯澶淵揚言帝在軍中自是澤不復
預府中謀議帝決意趨東平庚寅帝發大名

建炎元年春正月癸巳帝至東平初帝軍在相州京城圍外莫知帝處及是陳請四集取決帥府壬寅高陽關路安撫使黃潛善總管楊惟忠亦部兵數千至東平命潛善進屯興仁留惟忠爲元帥都統制金人聞帝在澶淵遣甲士及中書舍人張澂來召宗澤命壯士射之澂乃遁伯彥等請帝如濟州二月庚辰發東平癸未次濟州時帥府官軍及群盜來歸者號百萬人分屯濟濮諸州府而諸路勤王兵不得進二帝已在金人軍中三月丁酉金人立張邦昌爲帝稱大楚黃潛善以告帝慟哭僚屬欲奉帝駐軍宿州

謀渡江左帝聞三軍籍籍遂輒承制以宗澤爲徽猷閣待制丁巳韓侂胄不退師徽宗北遷戊午承制以汪伯彥爲顯謨閣待制充元帥潛善爲徽猷閣待制充副元帥夏四月黏罕退師欽宗北遷癸亥邦昌尊元祐皇后爲宋太后遣人至濟州訪帝又遣吏部尚書謝克家來迎耿南仲率幕僚勸進帝避席流涕遜辭不受伯彥等引天命人心爲請且謂靖康紀元爲十一月立康之兆帝曰當更思之以知淮寧府趙子崧爲寶文閣學士元帥府參議官東南道總管統東南勤王兵邦昌遣閣門宣贊舍人蔣師愈等持書詣帝

自言從權濟事及將歸寶避位之意帝亦貽諸帥書以未得至京已至者毋輒入聞資政殿大學士領開封府事李綱在湖北遣劉默持書訪之又諭宗澤等以受僞命之人義當誅討然慮事出權宜未可輕動澤復書謂邦昌篡亂踪跡已無可疑宜早正天佐興復社稷不可不斷門下侍郎呂好問亦以蠟書來言帝不自立恐有不當立而立者丁卯謝克家以大宋受命之寶至濟州帝慟哭跪受命克家還京師趣辦儀物戊辰濟州父老詣軍門言州四旁望見城中火光屬天請帝即位于濟會宗澤來言南京乃藝祖興

王之地取四方中漕運尤易遂決意趨應天是夕邦
昌手書上延福宮太后尊號曰元祐皇后入居禁中
以尚書左丞馮澥為奉迎使皇后又遣兄子衛尉少
卿孟忠厚持手書遺帝皇后垂簾聽政邦昌權尚書
左僕射率在京百官上表勸進不許甲戌皇后手書
告中外俾帝嗣統乙亥百官再上表又不許丁丑馮
澥等至濟州百官三上表許以權聽國事戊寅命宗
澤先勒兵分駐長垣韋城等縣以備非常東道副總
管朱勝非至濟州宣撫司統制官韓世忠以兵來會
庚辰帝發濟州郵延副總管劉光世自陝州來會以

光世爲五軍都提舉辛巳次單州壬午次虞城縣西
道都統管王襄自襄陽來會癸未至應天府皇后詔
有司備法駕儀仗乙酉張邦昌至伏地慟哭請死帝
慰撫之承制以汪伯彥爲顯謨閣直學士黃潛善爲
徽猷閣直學士權吏部尚書王時雍等奉乘輿服御
至群臣勸進者益衆命有司築壇府門之左五月庚
寅朔帝登壇受命禮畢慟哭造謝二帝即位于府治
改元建炎大赦常赦所不原者咸赦除之張邦昌及
應干供奉金國之人一切不問命西京留守司脩奉
祖宗陵寢罷天下神霄宮住散青苗錢應死節及歿

于王事者並推恩奉使未還者祿其家一年應選人
並循資已係承直郎者改次等京官臣僚因亂去官
者限一月還任潰兵群盜咸許自新免係官欠負蠲
南京及元帥府常駐軍一月以上州縣夏稅應天府
特奏名舉人並與同進士出身免解人與免省諸路
特奏名三舉以上及宗室嘗預貢者並推恩應募兵
勤王人以兵付州縣主兵官聽赴行在中外臣庶許
言民間疾苦雖詆訐亦不加罪命官犯罪更不取持
旨裁斷蔡京童貫朱勔李彥孟昌齡梁師成譚稹及
其子孫更不收叙内外大臣限十日各舉布衣有材

畧者一人餘如故事以黃潛善爲中書侍郎汪伯彥
同知樞密院事元祐皇后在東京是日徹簾辛卯遙
尊乾龍皇帝爲孝慈淵聖皇帝元祐皇后爲元祐太
后詔史官辨宣仁聖烈皇后誣謗築景靈宮于江寧
府壬辰以張邦昌爲太保奉國軍節度使同安郡王
五日一赴都堂參決大事以河東北宣撫使范訥爲
京城留守癸巳遙尊帝母韋賢妃爲宣和皇后遙立
嘉國夫人邢氏爲皇后耿南仲罷甲午以李綱爲尚
書右僕射兼中書侍郎趣赴行在楊惟忠爲建武軍
節度使主管殿前司公事罷諸盜及民兵之爲統制

者簡其士馬隸五軍乙未以生辰爲天申節馮澥罷
以兵部尚書呂好問爲尚書右丞命中軍統制馬忠
後軍統制張換率兵萬人趣河間府追襲金人丙申
以呂好問兼門下侍郎丁酉以黃潛善兼御營使汪
伯彥副之真定府路副總管王淵爲都統制鄜延路
副總管劉光世提舉一行事務王時雍黃州安置命
統制官薛廣張瓊率兵六千人會河北山水砦義兵
共復磁相戊戌以資政殿學士路允迪爲京城撫諭
使龍圖閣學士耿延禧副之贈吏部侍郎李若水觀
文殿學士謚忠愍己亥召太學生陳東赴行在李綱

至江寧誅叛卒周德等庚子詔以靖康大臣主和誤國責李邦彥爲建寧軍節度副使澠州安置徙吳敏柳州蔡懋英州李枕宇文虛中鄭望之李鄴皆以使金請割地責廣南諸州並安置辛丑詔張邦昌知幾連變勲在社稷如文彥博例月兩赴都堂壬寅封後宮潘氏爲賢妃以江淮發運使梁揚祖提領東南茶鹽事癸卯天申節罷百官上壽乙巳賜諸路勤王兵還營者錢人三千丙午以誣謗宣仁聖烈皇后追貶蔡確蔡卞邢恕蔡懋官以保靜軍節度使姚古知河南府金人陷河中府權府事郝仲連死之丁未徽宗

至燕山府庚戌以宗澤爲龍圖閣學士知襄陽府壬子進張邦昌太傅丙辰罷監察御史張所尋責江州安置丁巳詔成都在京北襄陽荆南江寧府鄧揚二州儲資糧脩城壘以避巡幸以簽書樞密院事張叔夜嘗援京城力戰從徽宗北行遙命爲觀文殿大學士醴泉觀使戊午右諫議大夫范宗尹罷遣太常少卿周望使河北軍前通問二帝西道總管王襄北道總管趙野坐勤王稽緩並分司襄陽府青州居住尋責襄永州野邵州並安置六月己未朔李綱入見上十議曰國是巡幸赦令僭逆僞命戰守本政責成脩德

以前殿前副都指揮使王宗濂引衛兵遁逃致都城失守責官邵州安置徽猷閣直學士徐秉哲假資政殿學士為大金通問使秉哲辭庚申封靖康軍節度使仲湜嗣濮王黏罕還屯雲中辛酉命新任郎官未經上殿者並引對御史中丞顏岐罷徐秉哲責官梅州安置詔河北京陝淮湖江浙州軍縣鎮募人脩築城壁壬戌置登聞檢鼓院癸亥以黃潛善為門下侍郎兼權中書侍郎張邦昌坐僭逆責降昭化軍節度副使潭州安置及受偽命臣僚王時雍高州吳玠永州莫儔全州李擢柳州孫覲歸州並安置顏博文王

紹以下論罪有差以知懷州霍安國河東宣撫使劉
韜死節贈安國延康殿學士韜資政殿大學士甲子
命李綱兼御營使乙丑以龍神衛四廂都指揮使馬
忠爲河北經制使措置民兵洪芻罷左諫議大夫下
臺獄丁卯以祠部員外郎喻汝礪爲四川撫諭督漕
計羨緡及常平錢物罷開封諸州軍府司錄曹掾官
州軍通判二員者省其一權減宰執奉賜三之一省
諸路提舉常平司兩浙福建提舉市舶司賊李孝忠
寇襄陽守臣黃叔敖棄城遁立格買馬辛未以子專
生大赦籍天下神霄宮錢穀充經費拘天下職田錢

隸提刑司還元祐黨籍及上書人恩數癸酉詔陝西
山東諸路帥臣團結軍民互相應援乙亥增諸縣弓
手置武尉領之宗室叔向以所募勤王兵屯京師或
言爲變命劉光世捕誅之戊寅以汪伯彥知樞密院
事遣宣義郎傅雱使河東軍前通問二帝己卯置沿
河沿淮沿江帥府十有九要郡三十九次要郡三十
八帥守兼都總管守臣兼鈐轄都監總置軍九十六萬
七千五百人別置水軍七十七將造舟江淮諸路置
三省樞密院賞功司東京留守范訥落節鉞淄州居
住庚辰以二帝未還禁州縣用樂辛己置沿河巡察

六使壬午以戶部尚書張慤同知樞密院事兼提舉
措置戶部財用癸未呂好問罷甲申併尚書戶部右
曹所掌歸左曹命尚書總領乙酉以宗澤爲東京留
守杜充爲北京留守罷監司州郡職田丙戌詔陝西
河北京東西路募兵合十萬人更番入衛行在命京
東西路造戰車丁亥以張所爲河北西路招撫使括
買官民馬勸出財助國戊子以錢蓋爲陝西經制使
封趙懷恩爲安化郡王因召五路兵赴行在秋七月
己丑朔以樞密副都承旨王瓌爲河東經制使庚寅
詔王淵劉光世統制官張俊喬仲福韓世忠分討陳

州軍賊杜用京東賊李昱及黎驛魚臺潰兵皆平之
辛卯籍東南諸州神霄宮及贍學錢助國用叙右監
門衛大將軍貴州團練使士瑋以磁洛義兵復洛州
乙未以温州觀察使范瓊爲定武軍承宣使御營司
同都統制丙申賜諸路彊壯巡社名爲忠義巡社專
隸安撫司戊戌欽宗至燕山府以忻州觀察使張換
爲河北制置使東都宣武卒杜林謀擾成都叛伏誅
己亥詔臺省寺監繁簡相兼學官館職減舊制之半
辛丑復議吳玠莫儔等十一人罪並廣南江湖諸州安
置餘遞貶有差壬寅詔奉元祐太后如東南六宮及

衛士家屬從行朕當獨留中原與金人決戰以延康
殿學士許翰為尚書右丞甲辰以右諫議大夫宋齊
愈當金人謀立異姓書張邦昌姓名斬于都市乙巳
手詔京師未可往當巡幸東南丙午詔定議巡幸南
陽以觀文殿學士范致虛知鄧州脩城池繕宮室輸
錢穀以實之丁未遣官詣京師迎奉太廟神主赴行
在巳酉罷四道都總管以尚書虞部員外郎張浚為殿
中侍御史庚戌徵諸道兵期八月會行在丙辰徽宗
自燕山密遣閣門宣贊舍人曹勛至賜帝絹半臂書
其領曰便可即真來援父母帝泣以示輔臣張所傳

亮軍發行在是月關中賊史斌犯興州僭號稱帝八月戊午朔洪芻等坐圍城日括金銀自盜及私納宮人芻及余大均陳冲貸死流沙門島餘五人罪有差勝捷軍校陳通作亂于杭州執帥臣葉夢得殺漕臣吳昉己未元祐太后發京師庚申以劉光世爲奉國軍節度使韓世忠張俊皆進一官辛酉右司諫潘良貴罷壬戌以李綱爲尚書左僕射兼門下侍郎黃潛善爲右僕射兼中書侍郎張慤兼御營副使癸亥命御營使副大閱五軍庚午更號元祐太后爲隆祐太后辛未罷傅亮經制副使召赴行在壬申召布衣譙

定赴行在命御營統制辛道宗討陳通是夕東北方
有赤氣癸酉以耿南仲主和誤國南雄州安置乙亥
用張浚言罷李綱左僕射丙子隆祐太后發南京命
侍衛馬軍都指揮使郭仲荀護衛如江寧兼節制江
淮荆浙閩廣諸州制置東南盜賊丁丑以龍圖閣直
學士錢伯言知杭州節制兩浙淮東將兵及福建槍
杖手討陳通庚辰降榜招諭杭州亂兵壬午用黃潛
善議殺上書太學生陳東崇仁布衣歐陽澈乙酉遣
兵部員外郎江端友等撫諭閩浙湖廣江淮京東西
諸路及體訪官吏貪廉軍民利病許翰罷丁亥博州

卒宮儀作亂犯萊州九月己丑建州軍校張員等作
亂執守臣張動轉運副使毛奎爲所殺判官曹仔嬰
城自守范瓊捕斬李孝忠于復州壬辰以金人犯河
陽汜水軍詔擇日巡幸淮甸鑄建炎通寶錢命淮浙
沿海諸州增脩城壁招訓民兵以備海道甲午命揚
州守臣呂頤浩繕脩城池宗澤往河北視師七月還
是夜辛道宗兵潰于嘉興縣丁酉詔荆襄關陝江淮
皆備巡幸戍罷買馬己亥以子粦爲檢校少保集
慶軍節度使封魏國公詔內外官司參用嘉祐元豐
敕以俟新書庚子二帝徙居霄郡辛丑陳通劫提點

刑獄周格營殺格執提點刑獄高士曠壬寅遣徽猷閣待制孟忠厚迎奉太廟神主赴揚州以直秘閣王圭爲招撫判官代張所尋責所廣南安置乙巳宗澤表請車駕還闕戊申河北招撫司都統制王彥渡河擊金人破之復新興縣己酉以謀報金人欲犯江浙詔暫駐淮甸捍禦稍定即還京闕募民入貲授官軍賊趙萬入常州執守臣何袞罷諸路經制招撫使庚戌始通當三大錢于淮浙荆湖諸路壬子命湖南撫諭官馬伸持詔賜張邦昌死于潭州併誅王時雍癸丑詔有敢妄議惑衆沮巡幸者許告而罪之不告者

斬乙卯王彥及金人戰敗績奔太行山聚衆其裨將岳飛引其部曲自爲一軍趙萬陷鎮江府守臣趙子崧棄城渡江保瓜洲是秋金人分兵據兩河州縣惟中山慶源府保莫邢洛冀磁絳相州又之乃陷冬十月丁巳朔帝登舟幸淮甸戊午太后至揚州己未罷諸路勸誘獻納錢物庚申罷諸路召募潰兵忠義等人及寄居官擅集勤王兵者癸亥募群盜能併滅賊衆者官之甲子以張浚論李綱不已落綱觀文殿大學士止奉宮祠知秀州兼權浙西提點刑獄趙叔近入杭州招撫陳通乙丑罷帥府要郡次要郡及新軍

水軍丁卯以王淵爲杭州制置盜賊使統制官張俊
從行庚午次泗州幸普照寺甲戌太白晝見己卯次
楚州寶應縣後軍將孫琦等作亂逼左正言盧臣中
墮水死庚辰命劉光世討鎮江叛兵辛巳以光世爲
滁和濠州江寧府界招捉盜賊制置使御營統制官
苗傅爲使司都統制朝請郎李棫提舉廣西左右兩
江峒丁公事癸未至揚州禁內侍統兵官相見丙戌
王淵張俊誘趙萬等悉誅之十一月戊子李綱鄂州
居住真定軍賊張遇入池州守臣滕祐棄城遁己丑
詔雜犯死罪有疑及情理可憫者撫諭官同提刑司

酌情減降先斷後聞壬辰遣王倫等爲金國通問使
乙未以張慤爲尚書左丞工部尚書顏岐同知樞密
院事丙申曲赦應天府毫宿揚泗楚州高郵軍丙午
以張慤爲中書侍郎戊申以顏岐爲尚書左丞兼權
門下侍郎御史中丞許景衡爲右丞刑部尚書郭三
益同知樞密院事權密州趙野棄城遁軍校杜彥擡
州追野殺之辛亥命福建路增招弓手金人陷河間
府是月軍賊丁進圖壽春府守臣康允之拒却之十
二月丙辰朔命從臣四員充講讀官就內殿講讀丁
巳詔諸路提刑司選官即轉運司所在州類省試進

士以待親策辛酉王淵入杭州執陳通等誅之壬戌
青州敗將王定以兵作亂殺帥臣曾孝序癸亥黏罕
犯汜水關西京留守孫昭遠遣將拒之戰歿昭遠引
兵南遁尋命部將王仔奉啓運宮神御赴行在甲子
改授后父徽猷閣待制邢煥爲光州觀察使乙丑詔
凡刑賞大政並經三省其干請墨敕行下者罪之丙
寅張遇犯江州戊辰金人圍棣州守臣姜剛之固守
金兵解去甲戌金人陷同州守臣鄭驥死之張遇犯
黃州己卯金人陷汝州入西京庚辰金人陷華州辛巳
破潼關河東經制使王瓌自同州引兵遁入蜀丁進

詣宗澤降乙酉增置廣西弓手以備邊以戶部尚書黃潜厚為延康殿學士同提舉措置財用

本紀卷第二十四

[Faded vertical text columns, likely bleed-through from the reverse side of the page]